



江戸遊記

丙午八月

江戸遊記

陽湖沈
嚴編述

MG
K931.3
24

江戸游記

目錄

月日

緒言

航海同人錄	五二〇
東人能自治	五二一
李文忠議約傷心處	五二三
四國島門司之天然產	五二三
楠木正成	五二四
水族館	同同
同文學校大會	同同
日本煙禁之嚴	五二五
西郷隆盛之公論	五二八

目錄



伊能忠敬之測海術	五二八
日露戰役紀念	同同
日本含專制性質	同同
日本開化有由	同同
日本得佛教大乘真相	同同
上野公園	五二九
動物園	五二九
帝室博物館	同同
井上哲次郎論吳摯甫	六一
警察法律權之重	六一
淺草公園	六三
日本社會風俗之難改	六三
警視廳	六四

日本政府之用款	六四
日本海權之擴充	同同
日本稅則	同同
芝區警察辦法之完全	六五
靖國神社	六六
游就館	六六
大村君銅像	六六
留學生品類	六七
論警察於言論自由	同同
長岡子爵同文主義	同同
警察法規要書	同同
學問界說之細	同同
日比谷公園音樂會	六九

芝區消防署試驗	六	一
停車場派出所管理法	六	一
巡查教習所	六	〇一
警視廳陳列室	同	同
白銀金獸場	六	一二
論立憲一	同	同
清水澄所著之憲法篇	六	一三
淺草區警察署	六	一四
衛生組合事務所	同	同
水上警察	六	一五
論留學界	六	一六
振武學校	同	同
芝公園消防試演	六	一七

鐵道株式會社	同	同
瓦斯株式會社	同	同
司法裁判所	六	一八
日本憲法比較	六	一九
帝國大學卒業之難	同	同
中人準入陸軍大學之訊	同	同
青山練兵場	六	二〇
品川鄉間警察	六	二一
警察劇場管理法	六	二三
新橋警察分署規則	六	二三
大臣不用儀仗僕從	同	同
商品陳列館	同	同
兩國橋焰火	同	同

東京監獄	六二四
帝國圖書館	同 同
東京美術學校	同 同
歐化主義之發達	同 同
論軍隊法律	同 同
自治團體與警察論	六二五
預備實行法律	六二五
巢鴨監獄	六二七
淀橋水源池	同 同
論立憲二	六三〇
日本醫學之精	七二
東京市養育院	七三
東京消毒所	七四

玉川館歡迎會之演說	同
早稻田大學	同
東京美術協會	七六
慶應義塾	七七
東京博物館教育館	七八
芝浦製作所	七九
沖商會	一〇
鐵道作業局	一一
東京郵便局	一一
帝國大學	一二
金港堂書肆事	一二
人民與政府衝突之結果	一二
勸業銀行	一三

電話交換所	同	同
警察與森林之關係	七	一四
高等工業學校	七	一五
立憲宣布	七	一六
憲兵司令部	七	一六
東京府女子師範學校	同	一七
日本立憲小史	同	同
帝國大學農科	同	一八
華族女學校	同	二〇
東京職工學校	同	二一
大倉商業學校	同	二二
礪兵工廠	同	二三
女子工藝學校	同	二四

日本女子美術學校	同	二五
國民紀念事	同	二六
海軍兵器局	同	二七
五二共進博覽會	同	二八

江戶游記

丙午夏。南皮宮保梁廉訪有派警察學生赴日本考驗之舉。命同往。並諭嚴寬留幾月。於警學外。旁考他項。東徂後。參稽昕夕。覘厥精神。凡立國之性質。政治之沿革。教育之普及。實業之發達。歷史學術之變遷。社會風俗之情狀。公園建造之用意。鐵道郵便之交通。國民軍人名譽之特重。〔軍人學生游覽陳列所博物館等地。入場券減半收價。其重兵士。與我國戟。成一反比例。〕礮兵工廠機關之秘密。〔日露戰役後。礮兵工廠不許尋常人參觀。某君語予大學高級學理。講師不盡情宣露。用意與此正同。果爾則我國留學生。充其極僅得其次者而已。〕

德川時代之制度何若。明治時代之更改何若。始取資中國者何若。繼效法泰西者何若。一一考其進化。求其真相。參觀互證。俾我國可以爲採擇規仿之資。滯跡數月。聞見不無。隨得隨筆。積成斯帙。有意被飾。反失其真。慮遽歸國。未遑整理。覽者弗以箸述論也。

五月二十日 午後二時許。由上海趁日本郵船株式會社薩摩丸東渡。此丸籍港東

京市。船路定限在近海航線。總噸數千九百三十九噸二五。汽機種類。聯成冷汽。汽罐種類。箭形兩口。汽壓制限九十磅。端艇六艘。甲種船長。英人土原虎雄。深諳海洋學者。同行爲崇明嚴友潮師愈、長沙李明池慶安、警視市川阿蘇次郎、譯員吉原大藏、巡查部長黑木三義、暨警務學生、傳晉等十八人。同艙有南昌梅擷雲同年光義、已畢業振武學校。將入聯隊預備進士官學校者。宜興任卓人承流將去入早稻田大學預科者。新建劉召民乘楨南洋派監督留學生者。安慶吳儀生政修游歷考察者。廬江劉述之體信將去留學法政科速成者。劉爲惠之同年胞弟。學殖甚深。梅任各攜眷屬。皆去留學。並有美國女士通中東英法語言在滬充教習暑假回新大陸者。二時二十五分解維。

二十一日 舟行萬海有浪。一二等艙位每間三四人合居。浣面各器寢褥等物。艙內皆備。惟一日三次西餐。於華人不甚適宜。蘇吳人晨慣稀粥。利消化器。最合衛生學。某客與友人在艙房談笑喧囂。一東人厭之。謂祇宜在艙外。蓋不可以一人而擾及公衆之安。雖微末而東人之能自治講公益。已可概見。午後五時舟顛簸甚。不能進食。

二十二日 晨六時抵高島。關人來驗病後。船進口泊長崎市。與明池坐公司小輪登岸。冒雨乘人力車至四海樓午餐。插雲卓人儀生三君先在焉。赴郵便局購印花票。受付俱用女人。辦事規則秩然。曾受過學校教育者。長崎四面山巒廻遶。爲九州島之市。故名長崎市。

二十三日 晨六時抵門司。關人來驗病後。船入港內泊。一時爭賣文具硯石菓品橘柚者陳設艙面。予昔在萍鄉見柚子黃實在冬月。何物候之不同也。北岸爲馬關。述之於煙霧濛籠中。指春帆樓而告予曰。此即李文忠甲午議約傷心處也。（李文忠在馬關議約畢。題傷心處三字而去。）舟中辦事房見圖二紙。一自長崎至唐津圖。一自平戶瀨戶至下關海峽圖。測驗處毫釐畢現。於以歎日人地圖學之精。由馬關起旋。入瀨戶內海。自長崎至門司。所見島嶼名九洲。由門司進瀨戶內海。北面一帶山岡蜿蜒。名本島。東南隅有四國島。與北海道毗連。本島出銅。四國島北海道出錫。門司出煤。馬關爲日本與外人第一。次開戰地。當時守鎖港主義。不與外人交通。致開釁端。日本大將遁去。遂訂和約。而馬關始爲通商港矣。門司市場稀落。尙有新聞紙館二三處。如門司新報九州新

報之類。船入港。有訪事向人探詢載客姓名職業。用鉛筆記簿而去。十一時開輪。晚九時過瀨戶內海。兩岸燈光閃爍。列一長線。詢知漁艇排立。其漁業發達。已可概見。自長崎以至九州。山鳥葱鬱。無一童者。其森林業之研究。又可見矣。

二十四日 晨七時抵神戶。關人驗病如前。船長以下亦均立艙面受檢查。市川黑木兩君先由長崎乘火車赴神戶。已在候。登岸後竟溫泉浴。午餐後游湊川神社。忠楠木正成墓。楠公爲日本第一忠臣。南朝時（德川得政柄後。時分南北兩朝。權勢漸趨重於北矣。）北條高時叛朝廷。楠公居

城爲高時軍所圍。屢運籌大窘。賊既而諸州官軍繼起。高時遂亡。後足利尊氏亦叛朝廷。楠公屢破之。與足利軍戰死。朝廷敕廟祀之。自大坂八里餘之西方。神戶之湊川神社是也。墓有中國浙江明徵士朱舜水撰書碑碣。予因購楊木全文一套。觀協正館正風館兩勸商場。場不寬。百貨鱗次。皆本國商品。至水族館。購入場券。縱覽各種魚族。其法用建方水池。上面使注洩空氣。魚游泳上下。外以玻璃圍之。人立如作濠上觀。並有玳瑁及各種乾僵鱗介品。陳列室內。見煎海鼠製法圖五。養鯉法圖六。凍瓊脂製法圖五。乾鮑製法圖五。又一圖有鱣釣、鱸釣、鯛延繩釣、鯖釣、鮎釣、鱈延繩釣、鱧釣、鮪延

繩釣、柔魚釣、鰯釣、鰈延繩釣、鮪延繩釣、鰻延繩釣、水鳥賊釣、淺草海苔圖解等法。九洲之部。本西部四國之部。相摸洋三百尋以上海底狀況各圖均在焉。日本自長崎以上。水族薈萃。故東京及外府縣設專校研究之。五時赴中華會館。適是日行恭迎。御頒同文學校匾額禮。鋪張甚盛。寓神戶之教習生徒商人男女來會有千數百人。同文學校本年閏四月蒙學部將歷年辦理情形入奏。有旨嘉獎。給匾額。是日舉行恭迎大祝典。假座中華會館。開立食大會。其恭迎儀式次第。(一)午前七時來校齊集。(二)同時三十分整隊詣領署。到領署迎區時。生徒持銃者行捧銃禮。軍樂隊奏大聖樂。(三)八時恭迎。御匾歸校。御匾到校時。樂隊軍隊行禮如前。(四)九時鳴鈴恭上。御匾。(同時奏大聖樂。)(五)九時三十分鳴鈴齊集禮堂。(六)總理校長監督職員來賓以次著席。率同全校生徒行最敬禮。(七)奏大聖樂。(八)總理祝辭。(九)校長演說。(十)職員來賓演說。一十二時奏愛國歐。禮畢出堂。一十二時三十分齊集赴中華會館立食會。海外士商遠離本國。而愛國之心。益形團結。所謂祖國不可忘也。晚赴唐人街中國料理館餐。神戶爲貨客出入要埠。各物騰貴異常。中夜雨。二十五日竟日寒。雨浪甚洶湧。自長崎至神戶。客大半乘火車行。因卸貨船停泊一日。

夜。頗覺岑寂。登陸散步。見華人某手持尺長之紙捲煙桿。警察巡查囑其將桿放入懷袋。以其類阿片煙桿狀。東人之仇視洋藥若此。(日本吸洋煙者死無赦。現行法處重禁錮三年。外人入境必傾篋倒篋檢之。壬寅冬吾國廣東人販賣鴉片被拘。定監禁罪六年。現尙在巢鴨監獄)

二十六日 十一時由神戶起碇。向西南行。經淡路島。天雖暢晴。海水深處。舟仍簸蕩。晚過紀伊海角。半夜經伊豆島。德川末時代。美艦到伊豆半島下住津需糧食。由此遂起開港之議。

二十七日 晨八時登船顛眺覽。於雲端中見富士山。日本第一峻嶺也。午十一時經相摸海。四時進海灣。東京之門戶也。砲臺四座。尙舊時式。過橫須賀。海軍鎮守府在焉。上村中將現鎮守府司令長官也。進橫須賀口。泊有軍艦五六艘。抵岸後先將行李移至旅具檢查場。查畢由旅館招呼購乘車券。九時抵東京。芝區愛宕町對陽館寓舍。

二十八日 晨移寓間壁信樂館。午後游愛宕山。山居最高勢。東京全市都在一覽。上有西南役兵士戰死之表忠勒功碑。碑中目西鄉隆盛爲叛逆。考諸日本維新先後歷史。南洲本幕府舊僚。爲維新三傑之一。當其時王權甫恢復。事未大定。內閣大臣各執

意見、南洲創征韓論、爲禦外自強計、以爲專注外務自無心爭執內、見此南洲調和國內臣僚之苦衷、兼以伸其耀武海外之素志。（西鄉常曰必力能威服東亞）政府大臣不聽。岩倉具視復固執不可。南州憤恨罷職。鹿兒島羣徒舉動。推戴南州。國家用兵六萬餘。與相持八閱月而卒勝。安見當時國力之不能征韓乎。南洲逝世。日本進步益猛烈。其威聲且不但震懾朝鮮。而南洲已能決見於二十年。前是何等識力。乃以事機所迫適當其衝。至使南洲蒙叛逆之名。是南洲所不料。實南洲之不幸。南洲而果思反叛。其精神偉力。於傾覆幕府之時如反手耳。而尙待維新後耶。讀史者以皮膚之見測之。吾未見其有常也。陸仁明察。深知南洲之心。憲法頒行之日。除其賊名。復其爵秩。上野銅像。巍然千秋。而南洲之誣可白於天下矣。（明治維新小史第三章征韓辨論。及勝海舟氏）赴芝公園。見伊能忠敬測地遺功表紀念碑。忠敬精於測海學。東海島嶼皆其密測細量。閱十八年而成書。爲後來航海者指南。殆哥倫波之流亞也。觀芝增上寺。內有明治三十七八年役芝區戰死病歿者紀念碑。三十七八年役日露戰爭第一師團將校同相當官陣歿者之靈龕。令游觀之人。發其忠君愛國勇敢尙武之精神焉。進櫻田門眺覽皇城。再

進則二重橋警衛森嚴。不能瞻視。此橋爲皇輿出入必由之衝。常有近衛兵守護。吉原謂美國大總統盡人得見之矣。日本雖稱君主立憲國。尙多含專制性質。以較英米等國程度。尙不及遠甚。距二重橋數十武。有明治三十年所建楠公正成銅像。披甲騎馬。威風凜凜。日皇以楠公爲忠於王室。因建其像於宮門外。以激勵諸臣民。五時至京橋區銀座通觀博品陳列館。凡國內商品悉陳列其中。而無些子外國輸入之品。中國內地。東洋商品充物肆塵。又性喜便宜。不論貨物精粗。日人益得售其狡騙之術。若不思有以抵止之。恐我國實業之權利。將爲人剝蝕而無餘矣。日本善學於人。而亦善變。究之一變至道。厥有原因。以言道德。日本向稱君子國。自經開化。而人格愈高尚。自治益嚴正矣。以言性質。日本向有武士道大和魂。擊劍柔術。夙所嫻習。自經開化。而尙武精神。益流露矣。以言女界。日本向無纏足惡俗。又不若中國之幽閉深閨。自經開化。而女學自易發達矣。以言藝術。日本陶工漆器。向稱精緻。自經開化。而美術彫刻器械標本之學。益有進步矣。以言養生。日人勤浴。起居飲食。最愛潔清。自經開化。而衛生之學。益易發明矣。以言林木。日人素善培植。剪伐布置。天然入畫。自經開化。人人知種植之可

以吐納養炭氣。而森林之業。益繁茂矣。佛教創於印度。風靡於東亞全州。而得釋迦牟尼之真相者。厥惟日本。（佛學之輸入日本條大乘宗）釋迦得力處。在勇猛精進。牢固堅忍。大雄。大無畏。力反婆羅門尊君抑民以人類爲四等之舊俗。而一治以平等平權之法。謂人各自由。不得以威力壓之。日本之武士道大和魂。即釋迦勇猛無畏之性質也。講求平等。受範憲法。即釋迦平權自由之宗旨也。佛學分南北二派。南宗小乘。北宗大乘。大乘救世度人。涅槃衆生爲己任。近伊近孔。是釋迦之眞派。小乘獨善其身。遁於頑空自了。其術近楊近老。爲釋迦之孽派。中國歷史界以佛老教混合爲一。是爲佛學第一閉塞時代。迎佛關佛。廬居火書。皆差以毫釐。謬以千里之舉。是爲佛學第二閉塞時代。目爲元妙法宗。川爲清靜養心。是爲佛學第三閉塞時代。至世界迷信派起。普天下愚夫婦燒香誦經。而佛學掃地盡矣。是爲佛學第四閉塞時代。日本既得孔學大義。又得佛學眞髓。再加之以歐美文化。故能思想偉大而雄視東方。予讀世界進化史至宗教篇。有云山林寂靜。正佛所詆爲頑空。爲斷滅。爲九十六種外道。觀佛立教之旨。曰奮迅。曰勇猛。曰大無畏。曰大雄。可知善學佛者。未有不震動奮厲。而雄強剛毅者也。其言深得佛學

之旨矣。

二十九日 午後乘電車赴下谷區凱旋門。(係戰勝露國奉凱而設) 游上野公園。瞻仰西鄉隆盛銅像。氣宇雄偉。自是豪傑。銅像下石上鐫獎勵敕文。旁有彰義隊戰死之墓。彰義隊戰死之圖。及明治二十九年再建上野公園彰義隊墓表之始末記。記文尾有詩云。昔時布金地。今日草茫茫。誰笑千年後。却憐古戰場。至動物園購入塲券。所見禽族如朝鮮產白鶴。鸚哥濠州產鶯雉。壽雞鷺珠雞暹羅產鴿鷓之屬。獸族如北亞非利加產獅子。牡亞美利加產駝羊。犛牛。日本上野國產黑熊。濠州產魍之屬。(形似熊口尖時跳頓) 魚族如丹墨國產四尾鯢魚。一尾鯢魚之屬。陳設鐵圍木筐中。供人參觀比較。以驗動物之進化。漸購券觀日露戰爭遼陽激戰水陸戰爭圖。其法用光學將寫真片放大。彷彿目見礮彈狼藉兵艦沉沒之狀。足動人勇往戰死之心。日本之激勵軍國民。往往若此。行數十武。購券觀帝室博物館。館外有痘醫祖善那君之銅像。館內有有栖川親王騎馬之像。其間陳列分天產動物植物各區。分歷史文學金石服與宗教風俗石器時代銅器時代各部。羅列珍奇。無美弗具。略一周覽。目眩神迷。以歷代世界所有之物品。驗古今東

西各國文明之進化。與學問上有至大關繫。非供人賞鑑也。(風俗部陳列中國與鴉片纏小足之怪現狀。且與朝鮮並列。不堪寓目。)

六月初一日 晨八時偕吉原乘電車赴橫濱正金銀行兌取日幣。後在橫濱公園午餐。漸乘汽車回寓。湖北留學生監督喜仲泉觀察源來談。爲言留學界事之難於管理。予謂各省派遣學生。無論官費私費。當由學務公處嚴加考試。擇年稍長而國文優者充選。(日本各學校凡國學欠優者減分數。中學校尤注意此科。)若聽人自便。漫無限制。小則喪敗名譽。大則辱及國家。此非辦法也。某君爲述文學博士井上哲次郎論吳肇甫汝繪東游一事。當吳將赴東京之先。日本高等文部省官震其名。有至新橋停車場歡迎。以爲中國之國學泰斗也。其後吳與諸學士博士接譚。喜言章句瑣碎學。東邦士人皆云。此來與先生一道世界教育。及亞洲中國印度各種學派。非與辨難鄭康成之學也。吳茫無所辨。自此後視吳不若昔重。吳自顧無謂。及回國時。每日作詩贈答。與諸學士博士往還。借以敷衍而已。然先生非絕無學識者。以域於中國五千年來之歷史界。所以藩籬限而耳目封也。自東游回國。則幡然以更新學術力求開化爲事矣。又云。日本自

與露國戰勝後。各校益注重實業。專門大學不收外人。至經緯宏文清華成城等校。即使入而二年三年畢業。僅具普通資格而已。警察官在維持安甯秩序。或有妨臣民幸福之發達者。則保持之。故異於行政官。然其所以有莫大之權力。是不可不求之於法律。普魯士憲法第九章曰。公益上必要之處。必依法律所定。日本憲法第二十七條。警察必以法律定其基礎。日本至明治二十二年。憲法尙未制定。警察權之範圍。不免茫漠。及憲法既實施。警察大改其面目。日本松井茂警察要論。有立憲國家之警察原則。可約言之。

第一 專制國家公安之如何。依君主專斷而裁定之。立憲國家。雖有議院制度。宜屬於警察之事項者。關於憲法第二章之事項。以法律規定之。

第二 法律上之原則。憲法中明文。各臣民之自由權不可侵。蓋禁警察侵入國家之權力也。臣民之自由權利者。實爲國家權力。特與警察權示其限界。

第三 國家當未立憲之時。臣民全體生活上。國家動爲之干涉。所謂公安上一切行爲。必使之畫一。立憲國家。簡人力不能及之時。國家於此宜與以補助。警察與

人民有直接之關繫。又有其制限。以其事項在憲法第九條。不得以命令規定。必以法律爲基礎也。

警察與人民事。可行其干涉之權力。各國定以權限。而又與以法律上之施行。至法律上之當執行者。警察又不可放棄其責任與特權也。警官依法律之行為。無論若何人不得而與之爭執之。以日本論。其巡查肅立市街。毅不可犯。其目的在愛護人民。（日本巡查。望之若不可侵犯。接之實。誠然可親。故東京市民有怕警察愛警察之恒言。至上海居留地之警察。全施其壓制權力。以待殖民屬地之法相待。無絲毫愛護人民之心。性質與此絕異。不可爲法也。）防止危害。

雖外人亦受其法律之範圍。故外人見其制度之完善。雖遇傷害。亦祇能自解於言動之不謹。並不敢向政府要求賠償焉。（明治維新小史云。近十年外人在日本遇害者不止一次。不敢要求。如前年俄皇爲太子游歷日本。爲巡查所傷。並未賠償是也。）日皇又時有特召至內廷慰勞之舉。其以死勤事者。特建神社祀之。與軍人無異。由是警察巡查各官。益知自重。至其人格整齊。舉止嚴謹。固皆係有道德教育之人充任之。而民之服從不敢違者。以有管理法律之特權故也。晚江夏留學生杜蘭蓀。光佑偕其姪杜子行。恕及夏子文。道炳來

談。夏於法政學甚有心得。所述法律裁判及市町村制辦法。原委甚悉。

初三日 午後二時游淺草區淺草公園。並東本願寺。公園左右爲傀儡劇場。下流社會。游觀蠅集。日本惟此等地方。往往着二關繫物。如觀音寺建日露戰爭死難之紀念碑。戲場準演日露大戰記。藉以激動民人從軍報國之心。其用意爲至深也。日本維新以前。貴族階級甚嚴。民庶不得有姓自改革之。初秩序始破。加藤弘之請廢穢多非人。改稱新平民。津田眞道請廢奴隸買賣之制。而庶民之思想稍變。自由平等之說亦緣之而盛行。以今觀之。日本民智雖開。社會舊俗尙多未能盡變。席地坐臥。可省牀桌。固因經濟困難。究於胸膈屈鬱。有傷衛生。中國易席地而用桌。號稱便矣。故西洋亦同。此風俗之當改易者一。中國布履。歐西皮鞋。步履甚整。日本履齒橐橐。殊不肅靜。此風俗之當改易者二。西人服御緊束。不令鬬茸。東人無論男女。披和衣一襲。並無下褲。維新後雖禁男女共浴。而澡池赤體。公然不避。中西所無。究形野蠻。此風俗之當改易者三。中西婦女。未聞露胸赤足。東婦習不爲怪。女學生多服紫裾。東人亦明知之矣。(於書肆見有日本正風集一書。士夫頗注意及此。)此風俗之當改易者四。凡事出於根性者難改。出於風俗者可改。

中國辦事遷延之人。不曰參酌情形。即曰因地制宜。此亦當分別根性風俗言之。不能一概論也。憑欄見愛宕山下幼女學生齋聲唱歌。游戲運動。天機活潑。其樂陶然。羨其教育之普及。女學之發達。而不禁爲祖國無量數之婦人幼女悲也。

初四日。晨九時赴鞠町區警視廳。市川爲言日本警視廳之設。始於大警視川路。川路往歐州考查警察。歸而仿辦。遂有警視廳之發起。蓋在維新後十七八年。當初辦理規模。屋宇房舍甚窄。今之警視廳。明治二十二年所建。室內懸寫眞八座。即歷任之警視總監也。廳須另行構造。現鐵道作業局。以東京人煙日益稠密。商務年盛一年。新橋停車場外。擬建一大火車棧。以警視廳改建之。名曰中央火車場。政府已議定。警視廳將遷移他處。改建經費需四十萬圓。明年可落成。此係國家經費也。警視廳事務甚詳。先將官制及規則大概言之。(另有警視廳一覽表)警視廳第一高官名警視總監。警視廳設總監官房。掌關於廳員之進退身分文書高等警察外事會計事項。分三課。第一課管理秘書文書往復電信。第二課管理保安外事檢閱。第三課管理出納用度。官房第一課長置主事一人。以警視補之。第二課長第三課長。以警部或警視屬充之。各課係員。以警

部警視屬通譯充之。警視廳置第一部。掌關於司法警察及警衛警務等事項。分二課。第一課管理刑事戶口遺失物。第二課管理警務警衛。第一部置部長一人。以警視補之。警視廳置警務長。以第一部長警視充之。每課置課長一人。以警部或警視屬充之。課員亦以警部或警視屬充之。警視廳置第二部。掌關於營業風俗交通安甯等特種行政警察之事項。分二課。第一課管理營業風俗。第二課管理交通安甯。第二部置部長一人。以警視補之。每課置課長一人。以警部或警視屬充之。課員亦以警部或警視屬充之。警視廳置第三部。掌關於衛生警察事務。分二課。第一課管於保健防疫。第二課管理醫務獸醫分析。第三部置部長一人。以警察醫長充之。每課置部長一人。以警察醫長充之。課員亦以警視屬及警察醫充之。警視廳置消防署。掌關於水火消防事項。分二課。第一課管理消防水防事務之規定。第二課管理器械等件。消防置署長一人。以第一部長或第二部長之警視兼補之。每課置課長一人。以消防士或消防機關士充之。署員亦以消防士消防機關士充之。

警視廳各課分掌事項表

總監官房

第一課

秘文往電

書關於秘密文書。廳員之進退。賞罰。叙位。受勳。恩給。扶助。
其他身分及官印管守。儀式。警察消防官吏之彰功等事。
統計。製圖。圖書之購置保管貸借。本廳出版物。並不屬他主管之庶務等事。
復關於文書之收受發送。淨書。及來應者之引接。
信關於電信。電話。非常報知機之通信。架設。保修。電信工
人之備入解僱。警報及天氣豫報之通信。並揭示等事。

第二課

保外檢

安關於集會及政社。政治上不逞之徒之
事關於公使館領事館員。名籍之調查。外國文書之
閱關於新聞紙雜誌。出版物。及著
作物。並碑文墓標之檢閱等事。

第三課

出用

納關於國庫及地方稅收支豫
度關於物品之調度廳台之修築地。所建物之保管。及其處分。沒收及不用品
工等之進退。及其他之身分。脚夫僱用。舟車馬之借給。並廳中取締等事。

第一部

江戶游記

第一課

刑 關於司法警察。贓物。遺留品。及品觸。留置場。刑事
 被告人。囚人。護送。並法廷取締。巡查派出等事。
口 關於戶口調查。棄兒。迷兒。變死傷者。前科者索引。及犯罪人之
 寫真。被監視人。乞丐。浮浪者。失蹤者。瘋癲不良子弟等事。
遺失物 關於遺失物。漂流物。
 及埋藏物等事。

第二課

警 關於警察區劃。及警察署處務規程。警察職員之配置及服務。巡查警
 務。察書記之進退賞罰。及其身分。鹵簿。勅使警衛。巡查給助例。巡查召
 募及教習。警察署長會議。巡閱事務。諸取締巡查臨時配置。請願巡
 查。陸海軍召集事務。警察諸費之調查。警察上人民賞與等事。
警 關於特別警察帝國
衛 議關於特別警察帝國

第一部

第一課

營 關於取締諸營業。營業會社。市場。諸工場。貯藏場。
 魚獸化製場。肥料。度量衡取締。鎗砲火藥等事。
風 關於劇場。香席。觀物場。遊覽場。遊技場。諸興行。路上諸藝人行商。待合茶
 屋。遊船宿。貨席。料理店。飲食店。貨座敷。引手茶屋。及藝妓。博戲。富籤
 類似之所爲。宗教風俗取締。御紋章。御肖像。勳章記章取締。寄附金募集。
 並形像取締等事。

第二課

交 關於道路。橋梁溝渠。下水。鐵道線路及停車場。船車取締公園。河岸地。共同
 通物場。船燈信號器救命具。田野。森林。河海。堤防。用惡水路。陸路測量標
 並警報信號等事。
安 關於獸獵及驅除有害禽獸。獵虎。臘肉。獸獵業電氣事務。防火線路屋上制限。
 煙火其他發火物。燃質物。移多保護。災害救護等事。

第三部

第一課

保 關於醫師、產婆、其他醫療營業取締。藥品。賣藥部外品。及著色料。上水道之健他物品。牛乳。榨取。乳製品。清涼飲料水。水雪。及其他之飲食物。飲食器。割烹具。及其腸骨取拔場。屠獸場。畜舍及斃獸清潔保持。汚物及胞衣產穢物取扱營業。娼妓身檢。檢查事務。密賣淫婦之診療事務。精神病者監護事務。臺地火葬場。及埋火葬工場。食品市場。衛生並公眾衛生等事。

第二課

醫 關於職務上負傷者之診療及傷損策定。巡查消防機關手之體格檢查及診斷。務途上急病者。溺水者等之救護。變死傷者精神病者之診斷。公私立病院傳染微菌檢索。留置人之診療。並公眾衛生。及工場衛生醫務等事。獸醫 關於獸醫之預防及檢疫上醫務。屠獸賣肉。牛乳。乳牛及馬肉檢查等事。獸肉。牛乳。飲料水。清涼飲料水。水雪。其他之飲食物。著色料。藥品。賣藥部外析品。爆發物及發火物。飲食器。割烹具。其他之物品。毒物。工場衛生等之檢查等事。

消防署

第一課

關於消防水防事務之規定。消防區劃。並消防職員之配置及服務。消防組之編成。消防機關手調馬手。消防組員。稽番之進退賞罰。給助。其他身分。消防會議。消防水防費。消防出張所。分遣所。器械置場。及火之見梯子等之配置移轉等事。

第二課

關於器械之管理。非常報知機及電話機。地利水利之調查。器具新調修繕。其他受授消防機關手志願者試驗等事。

此外東京府下設警察署二十三所。水上警察署一所。及警察分署十三所。警察署各

置長一人。以警視補之。暑員以警部充之。警察署以下分署置長一人。以警部充之。警察分署員當必要之場合。以警部充之。警察置巡查警察書記。警察醫員。各警察署及各分署之下。設派出所。鄉里設駐在所。市川警視云。今日考驗廳內規則。各部各課正在室內辦事。甚形忙碌。不能悉力照應。各考察人員可不必語言。恐妨礙辦事也。對面有一室。凡警察上用過物件。與巡查因公殞身時之冠服刀劍。均陳列室內。可參觀。我等現今環坐之室。即會議室。每月一次。警視總監與各警察署在此會議事件。(警察各署刻刻有事商問事件。電話至便。中國辦警察地方。總分各局日日奔走。名為議事辦公。而廢時荒職。與從勞瘁。仍於實濟無益。)警視屬新藤銀藏導觀第。三部衛生檢查室。凡民間出賣食物。統送室內檢驗。如牛乳酒物之類。有無損害衛生。經檢查後。方許出賣。每地每人之售物品。各繫記號。待其來取。管理檢查人不但在室內。並時向各市塵嚴查。小孩玩具。恐有毒品誤入口內。亦歸入此課檢查。次官房文書課電信係。電具甚夥。東京內電信電話由此通轉。室內有非常報知機八座。以通各處。有番號冊。巡查遇途上有非常事件。報知此處。每區每町每事。電條有記號。一望而知。由警事廳分別電告各警署各派出所。消息之靈。不半時而東京市內已徧達矣。次管理遺

失物所。凡巡查及民人送來遺失物。均標地方年月日及送人姓名。陳列木櫥。如質典鋪。過一年無人來領。將此物賞與攜得之人。銀錢另有安置處。或貯諸銀行。規則條理之精密。一望皆是。次彰功室。其上層係戰爭死難者寫真。下層即巡查與人民及盜竊等相持。因公殞命時衣冠刀劍俱在焉。日本表彰追錄。善用此術。所以人民易於激發感動也。次第一部刑事課室。內有索引簿。凡犯罪姓名多記其中。至七十歲入除名籍。蓋優待年老人犯也。次觀巡查馬房養馬法。馬分兩等。其精強上駟。備警御得駕時之用。次觀黴菌驗視室。異樣之氣。幾欲掩鼻。有鼠百羣置桌上。用藥水洗去黴菌。仍將所死動物埋藏之。(鼠有微菌。為傳染種警署出錢。取買。以獲鼠為業之人不少。)其研究衛生。保重生命。乃至於斯。晤警視總監安樂兼道云。諸君來此考驗警察。巡查派至數十人。中國前此未有之舉。中國與日本為同種同文之國。如中國整頓內政。辦理完全之警察。倘收效果。不但於中國有益。即日本亦深受其福。諸君若此實力考驗。警視廳內當極力擔任指導之責。次觀消防本部。器械課長消防機關士土田團之助。囑消防手數人。將救火梯運出。演習試驗。土田君云。高樓失火。人不能下。用此具救之。梯高有六十餘尺。共三層。遠地用三匹馬

力。近處用二匹馬力駕駛。頃刻即至火場。此梯機關。頗費人力。如梯下不平。便有顛墜之虞。前後用機關旋轉。愈旋則梯愈高。機愈有力。梯上容三人。三人相距二丈餘。當機軸旋轉時。必先將梯之準頭運轉使平。則梯全身俱平。方可無患。此類消防器械。購自德國。消防手三人。一面演試機。關士一面指說。躍情狀。彷彿救火當時。梯具各項。一分三十秒鐘可預備完整。次觀火龍機筒。尚係舊式。已用二十一年矣。購自英國。用三匹馬力。此機筒東京有八座。機具下炭鏟。三分鐘時可沸熱備用。有進水出水之汽管。用皮帶唧接以吸水。地方繚曲。機械不能回旋。用帶引水。水可吸射。高遠可七百五十丈。拖引救火梯救火龍之馬。平時日日習練。臨時方可捷駛。現有馬三匹甚精壯。如有火警。一分三十秒鐘可馳赴消防線圈內。次觀防煙裝具。外係皮質。消防火夫戴之頭上。有透空氣洞。下面以皮袋小口作信號。消防夫此刻不能啓齒。用手捺口袋作音號。火警與生命財產有大關係。故東西國甚爲注意。此項消防機械。中國可仿購也。次觀第一部警務課。次第二部交通課。課長下有警部兩人。再下有屬官三人。交通分三項。一水。一陸。一各項事務。署長云。凡出洋工人鐵路。亦歸此管理。東京電車始於明治三

十七年。現車線延長有八十英里。逐漸推廣開通。電車已有七百乘矣。去年因電車衝突損傷五十餘人。然此是交通利器。益多損少。流通血脈。萬不可少。雖有傷害之入。當思改良之法焉。次觀會計課之裁縫室。凡巡查冬夏衣服冠履。堆積若山。如一大估衣舖。巡查衣服每套用二年。材料最尙結實。課長長澤誠之助。因試驗檢察材料器械及藥水等物。先用玻璃瓶盛水使滿。下用火燃。燃過三十度。呢布纔破。是合用材料。劣者不三十度已破碎矣。又呢質每攪和綿紗。用一種藥水燃化。呢化去而綿紗不化。即知攪雜綿紗。並有藥水試驗呢料上次等。次者變其原有之色。上者不變。一經化驗。又知同一呢料而美劣判然矣。次觀官房會計課營繕。蓋建築繪圖室也。課長將新繪警視廳圖及各警署圖陳覽。主理繪圖者有六七人。十二時回寓。喜監督來談稱東京監獄青年監獄辦法之善。幼年罪犯獄中教以一切工藝。性質與學校同。并有慕其教法而以子弟送入者。日本政府用費。皆由國內籌畫。向不輕借外債。以外債之足危國也。(讀中國國債史令人生愛)自日露戰役後。各項稅課加重。(如電車費每人四分一、分)日本稅則向分三等。大宗爲酒稅租稅營業稅所得稅。(人民職業所得至三百圓以上得課百分之)市塵商品日盛。而何患乎貧。

國家用款宣告。而稅重不怨。國稅由政府徵收。爲國家辦事之經費。府縣稅由府縣徵收。以辦府縣之事。郡市町村稅由郡市町村徵收。以辦郡市町村之事。未取之先。交議會議。可而徵收。既取之後。經會計檢查而無弊。(會計檢查院直隸)中國今日外債日積矣。舉辦新政。在在需款。畧事加取。目爲苛斂。人民懷怨。反滋亂源。其故實由於官吏之中飽。檢查之無院。國家豫算決算。既無議會。又無布告。再加以教育未普。民智多塞。工商業之慮敗。游惰民之充物。久而久之。恐財源將有斷絕之虞。此觀人觀我。而當思改絃易轍之方。或足以救弊而扶衰也。世之論日本者。動曰一小島國耳。而實闔於世界大勢之言。歐西立國。全恃海權。日本海岸線延長有四萬五千里。領海之權。日益擴張。調查海軍艦表。戰鬪艦、巡洋艦、水雷艦、水雷艇、驅逐艇。共計有一百四十三號。而雄武之氣概。愛國之思想。多數人民。大概有之。而尤以軍國民爲最。日之所以勝露。非以槍礮器械之銳利勝。而以軍人之愛國熱心勝。露之所以敗。非以槍礮器械之劣鈍敗。而以兵民之漠視國家敗。故衛國先重軍民。而對外必握海權。日本政俗。擷要述文部大臣犬養毅君前在清華學校開校時演說。謂中國海灣海港。盡租與英法俄德。引虎

入宅本國僅留芝罘一區。又波濤險惡。停泊難穩。中國此後即復設海關。亦苦無立足之地云云。由斯以觀內地雖大。而設險安在也。日本稅則。分必須品與非必須品。必須品從不加稅。如米穀等物。非必須品從重加稅。如煙酒等物。國內商品稅則與售價甚輕欲。其輸出也。國外商品稅則與售價甚重。杜其輸入也。中國內地西洋商品居十之三四。東洋商品居十之五六。所貴工業發達。自行仿造。乃可漸漸抵止。然尙在幼稚時代也。

初五日 晨九時赴芝罘警察署。市川阿蘇次郎在武術場演說參歡次第。此場係巡查練習擊劍及柔術之用。有講座。有各項武術器。每禮拜署長囑派出所巡查會議。又在此研究警察法律規則。故一名法規練習所。未幾有四圍紅條車箱之雙馬車到所外。市川曰。此巡查押送罪犯車也。道途有犯違警罪。由巡查押送警察署審問。輕者暫羈留置場。或五日。或十日。重者送裁判所。歸司法官審辦。蓋行政司法。各有法規權限。不能混合爲一也。途上有遺失物。用麻布袋盛之。由押犯巡查馬車附帶交警署。晤署

長警視植木君。指導頗殷懇。先在柔術場演講警察署辦事大綱。芝區警察署管理地面事務之繁。甲於各署。與淺草區警察署同。署內設警部八人。分甲乙兩班勤務。間日休息。輪替更代。巡查二百四十六人。亦分甲乙兩班更代。甲班在署內勤務。乙班在派出所勤務。芝署派出所所有三十一所。巡查部長七十七人。貴族高官僱用護衛之巡查二十二人。刑事巡查七人。高等警察巡查八人。營業衛生巡查十人。俱在二百四十六人內。此分門大概也。以外巡查。充當雜務。芝區爲東京府一區地方。寬約中國三里許。長約九里餘。按道途繁雜地方。設派出所。所內三人。一暗巡。一見張。一休息。輪替更代。並有八人巡查。六人巡查。二人巡查之派出所。以地方之繁簡酌定。芝區有二萬五千戶。十二萬口。上年犯違警罪有九千五百件。有罰款者。有監羈者。此內犯道途違警罪有三千二百件。人力車犯違警罪有二千六百件。電車犯警章者有七百件。荷物車違警章者有七百五十五件。此皆交通警察上事務也。前年盜竊案有三千件。通常犯罪案有九百二十件。大概統計案件內。盜賄洋三萬九千六百圓。發見額二萬六千圓。不能發見額三千圓。警署內勤務分四項。一管理衛生交通。二管理營業。三管理司法。四管

理遺失物。民間建造房屋。修理道路。報告衛生交通課。舖戶開設。報告營業課。盜賊事。報告司法課。遺失物報告遺失物課。又有非常緊要事與各署有密切聯繫者。連環電信報告。譬如芝區地方與各警署有至重極要關係事件。立刻報告周知。又有戶口調查事。芝區地面有十二萬戶口。作一索引簿。注明姓名年歲籍貫。流寓之人。如招查問各區警署便知。植木云。世界各國內政之善。全恃戶口調查。此而辦得結實。諸務易於著手矣。管理索引簿。書記官三人。整理違警事。書記官三人。管理統計有二人。署長總持全項。每日每項幾件。各課不能悉記。有統計生管理之。每日事畢。開單報告署長知之。芝署警部八名。管理四項事務外。兼管派出所巡查。並有監督部長十人。平時輔佐警部。常宿署。以警部人數不多故也。警署管電信三人。管會計三人。火災盜竊殺人。用非常報知機。東京府市四百五十里地面。立刻周達。植木云。大概講演已畢。中國學生考驗。恐無實在益處。此何以故。學生雖解得一二。而駕乎其上的辦事人員。亦須有學有識之人。學生既未經過辦事。閱之恐不能了了。中國不若派幾個有學問而辦警務之人。詳細考究。自能實行。自能受用。予謂此即派學生不如派官員。派小官不如派

大官。派大官不如派親貴之說也。又云。歐西各國警察署室不尙深奧。會辦事務室。近道途地面。不能隔遠。取其便民報告。辦事易速也。(中國衛警局所多係分室辦事。以至人心難辦。可以事無隔膜。免於積壓。發人勤奮。聯合團體。此我國所亟宜仿效也。)署內一署長室。一事務會合室。一高等警察室。(東西各國凡管理出版檢查集會結社等事稱高等警察)一監督巡查休憩室。一巡查休憩室。一刑事巡查休憩室。一應接室。一食堂。一會計室。一電信電話室。一演武場。一留置場。一小使室。植木又云。署室規模不大。而皆適用。徒事房室高闊無益也。聞貴國各省辦一工廠。設一學堂。動輒耗費鉅款。建築祇壯規瞻。構造仍未合法。且非普及之道。內容完美。祇須表面端正清潔而已。予頷之無辭以對。導觀事務室。即衛生交通營業等四項辦公集合之地。案設四五座。分門別類。規則秩然。譬如參觀人至衛生交通課。營業課絕不應酬。照常辦事。一室之內。無絲毫紛亂之狀。警官平日多在署內。民間不拘何時。有事可立報告。現報告人多。上午赴署者。此不過習慣而已。警官常常有人宿署。司法課事夜間較白晝多。以喝酒開事盜竊鬪毆。大率在夜間。司法警察隨時審問。放留置場。至明晨酌定。或釋放。或送地方裁判所。署內問審案設一小室。上面稍高。如校舍講座。下面稍低。一木長桌。犯

者立對。平心講問室。無他人。不似中國之審問案件時。劣差靈役。紛站使威。敲本撲竹。種種狂暴野蠻形狀也。營業管理法。警署最詳。凡旅館流寓人姓名年貌籍貫。隨到隨時報署。歸入索引籍。東京市有一笑語。鄉間兩人乘火車抵新橋停車場。行李甫入旅館。即赴新吉原買妓。至明晨而忘其旅館之町目番號矣。不得已至警察署申告。乃得查明入旅舍也。次觀管理巡查之警部座。有甲乙兩班姓名簿。姓名牌。間日輪替赴派出所勤務。其簿表式如左。(警察各項事件簿表式另刻茲舉其例)

衛生	姓名	輪替交代
營業		
戶口		
風俗		

巡查休息時應報告。以備非常事機。可立時傳到。如派出所內有一人病。由警署派一人代之。所巡地方。巡查蓋用姓名圖章於前項一覽表。巡查身上携帶物。(一)手帖。(二)事簿(鉛筆)。(三)警笛。(三)捕繩。最秘藏不露。派出所三人。或二人。其巡迴見張。休息輪流更換。間

日一休。月休息十五次。遇非常事。如御駕出行。非番巡查。亦出見張。(三人二人勤務另有表)一巡查賜暇調簿。巡查如六箇月以內。未有事假。給與一禮拜假休。一年以內未有事假。給與二禮拜假休。一功過簿。(分甲)有功則賞。有過則罰。巡查派出所辦事勤怠記此簿。一(巡行線路戶口調查)監查簿。巡行線路。如有偷惰。戶口調查。如不核實。均有監查官察視之。以定其功過。一貴紳來往簿。將軍大臣出入。外國高官往來。巡查見之。隨時登記。每日親早署長查閱。一署員勤務指定簿。巡查每日來署。應辦何事。由署長指定。記錄此簿。一實効簿。將巡查之勤惰記於此簿。簿歸部長藏寫。再交署長核定。每人每日。監督巡查者各有一本。以便報明署長。一巡查報告及復命書綴紙。巡查管理事務。不論何種均要報告。(此係司法部由監督指定)一電車書綴紙。每項報告均用書綴紙。(另有報告書式)一事故件數表綴紙。將各項事目表列於上。如人力車電車之類。一事故錄。由鬧事地方報告警署。署內派巡查一人。將滋事人送署。暫置拘留場。至次日晨審明。如係喝醉酒物等事。警部嚴戒說諭釋去。蓋川名字圖章。呈署長閱。署長亦蓋用名字圖章於紙上。存以備考。(以上以監督巡)次觀司法部。管理民人報告犯事案件。一被告人送改摘要簿。一告發摘要簿。

一監視人名簿。一受發簿。一盜難告訴調書。一家出人搜查人名簿。一違警罪告發書綴。上層係巡查告發。下層係署長判決。(俱有表)一罰款宣布違警書紙。送出時附憑一紙。名送達書。(另有書式)一違警罪件名簿。一違警罪件名受付簿。一違警罪言渡收入印紙貼付簿。犯罪罰款。有用郵便印花者。以印花係國家物。可代罰錢。有罰十分者。有罰五十分者。最多以罰幣一圓九十分爲限。少則幾分。凡營業上有犯違警罪者。貼補印花居多數也。一事務日記表。每日事務幾項。電信往復幾項。文書往復幾項。辦事人數若干。均列表。中歸統計部管理。另有芝區全圖盜難被害場。凡強盜竊賊其他各項。分別用記號繪於圖上。(以上違警統計類)一戶口紙印片。裝成厚冊。如繪葉書。凡人數姓名年籍記入。一戶口異勤簿。用白紙小條逐行夾入。凡已死者。新來者。搬遷者。均注記報告。至戶口調查簿。存派出所。歸巡查經管。帶在身畔。如小號繪葉書。凡房屋大小間數。人口大小個數。合居獨居。何營業。每日每時調查記載。一覽即知。故此簿不能儲事務室也。凡名片已入索引簿。蓋索引圖記爲號。一旅館報告書紙。(以上戶口警察類)一監視人名簿。監獄中人每月兩次至警署查問。記入此簿。一家出人搜查人名簿。民人有遺失童孩。報

告警署。年若干。身長短若干。面貌若何。衣服若何。署內派巡查訪尋。(此非罪犯類事)一被告人送致摘要簿。送罪犯人記事簿。此人曾經已未犯事可考。一遺失物金受渡簿。分二册。此係拾物人報書。一贖幣要視察人名簿。一保管物下渡簿。一遺失物摘要簿。民人失物即報告。如二三日內不來詢問。將拾得物送警視廳。失物人當赴廳領取。偷民人拾得銀物各件。來署報告。以半贈報告人。(街途拾物報告送署者衆。衆想見風俗人心之美)半年內不報領充公。如係巡查拾物一年內不報領全數給巡查以示獎勵。一人民呼出伺簿。一下命簿。一受託料料金領收簿。一換刑名命令發送控簿。(以上司法遺失物類)一電線路施設願書。民人立電桿。先報告交通部。由署察定。人力車馬車等夫思作營業。先報告。察其人性質良善否。年力相當否。經許可後。方得行駛。一口頭道路施用受付簿。民間建造房屋。先報告。察其地方是否合於建築。是否有礙道路交通。占借街道幾月。落成應須幾月。築時派人察視。與以願濟。(即許可證書)方得興工。一廁圍新設願口頭受付簿。民間建蓋房屋。廁所位置須報告。由署員去察視。必於衛生無礙。方許可。一傳染病台帳簿。凡民人有虎列拉伯斯得(黑死病)、黴菌等病。立時報告遷移別院。

其屋內再用石炭酸水。行消毒法治之。一死亡檢查簿。人之死者。報告警署何病。何醫生診治。醫生并亦要報告何病用何藥。藥舖報告何人經發。鄭重生命至如此。宜其醫學發達。世界各國日本列第二國也。(德國醫學居第一)中國醫學數千年尙空論。無實驗。五臟部分。位置且未明白。豈能療治。醫生不知解剖學。與刑名不知法律學。久爲地球各國訾笑。至經庸醫殺死。而并諉之於命。愚憐已臻極點矣。(以上交通衛生類)一雜業渡世格印下付簿。一古物商營業台帳簿。古玩鋪不能妄設。先報告。由警署營業課察其人品若何。有無違犯。必經許可。方開設市塵。蓋古玩商易於欺騙。故警察必視品行爲斷也。一藝妓屋簿。一質屋簿。一貸人席簿。(此中國所無)一下宿屋簿。一諸營業簿。(以上警業類)次觀會計部。凡巡查衣服刀劍薪資。均由此給發。一收入印紙納付錄。一消耗品出納簿。一諸給與品受渡簿。芝署每年經費需六萬八千七百四十圓二角八分。統計警視廳警察署分署。一年經費需一百五十萬圓。次觀高等警察室。內電話兩座。一係專報總廳與各署互相聯合特別事件。一係報尋常事件。次審問室。次電信室。凡罪犯脫逃。立時發電各處。即可拿獲。次留置場。分別男女。與監獄同。次刑事係室。有數女在內。係盜難被

害者。盜品已於警署查獲發見。應將原物交與。蓋此數女即領盜品物也。刑事巡查。高等視察。風俗巡查。不服警裝。服尋常和衣。密巡私訪。即偵探警察也。衛生、交通、營業、刑事、高等視察、監督巡查部長、各係均在署內。表列於左。

衛生交通係

營業係

刑事係

高等視察係

監督係巡查部長

署內

常務巡查在派出所。戶口即歸管理。高等視察係。蓋管理關於政治集會。團體結社。及出版物檢閱等事。即保安警察也。總監官房文書課長新藤氏云。中國派員來東考查警務不下千數百人。(留學警察 生在內)皆其接待。噫。日本派一川路西遊。而得改良警察。中國派人若是其多。各省警察尚在黑暗時代。聞新藤言。能無顏慙。

初六日 晨九時赴九段靖國神社。大村君銅像在焉。考東史大村夙究泰西兵法。授

兵學校教授。參藩政。釐革兵制。慶應年之役。守藩北境。戰皆捷。明治維新。徵爲軍防局判事。一時幕府殘黨。據東叡山。君討而殲之。征奧羽。平函館。密參帷幄之謀居多。升海兵部佐輔。大定陸海軍基礎。明治二年。爲兇人所戕。後人表其偉勳。建此銅像。三條實美撰碑紀念。皆垂不朽矣。神社祀維新時死難將佐兵僚。日皇每年親赴御祭。有皇軍萬歲之匾額。與露國戰死兵丁之紀念碑。萃在一處。動國民愛國戰死之心。東京府市如靖國神社者爲最夥矣。購入塲券覽游就館。凡日本歷代死事將佐。寫眞片。衣冠刀劍。環列在焉。廣瀨海軍中佐之血痕帽。懸於架。血斑紫殷。變作淡色。點點猶存也。甲午之役。黃海礮艦各器械。並金州等地方官衙署匾額。萬民傘。天津海軍衙門之匾額。義和團時百姓送之萬民旗等。標題燦列。見之難堪。露國戰利器。被得尤多。黃海之戰實景圖。銃隊式沿革圖。明治二年台灣戰爭之圖畫。箱館戰鬪之油畫。明治十年西南役負傷者之寫眞。關涉於軍界上所有人物兵械。無不歷歷在目。激人忠奮。起人景仰。用意何其善也。普之敗於法也。繪油畫與國人爭覽。或且編入小學校教科書中教之。日本上六小學校講師訓其弟子之言曰。今俄國力絀於我。媾和且成。雖然。十年二十年

後必將報我。吾且老矣。諸生他日適將仗劍負弩。以與俄周旋。其各勉學以待風雲之會。勿恃勝而驕。驕必敗矣。以彼戰勝之國。尙時時以激勉之術。借圖畫教科等警覺國民勿忘。日本政俗擬要曰。陸軍幼年學校懸有甲午庚子二役死事之像。以勵生徒。見之生人悲感。彼兩次大勝。猶時時舉戰死者鼓勵其國人。吾國因此二役。與尸纍纍。割地償金。國勢一敗塗地。今且習而忘之矣。愛國心之少。人之度量相越。豈不遠哉。是以大小學校必提唱國民教育主義。游就館後面山麓。有碑石一亭。視之乃北韓咸鏡道壬辰義兵大捷之碑。明崇禎甲午之間。日人欲與中土構釁。假道北韓。北韓不允。遂與開戰。韓人大勝。此碑蓋紀實也。日露之役。中陸軍少將沖田正人得之。明治三十九年懸置於此。碑文計二千餘言。

初七日。竟日風雨。悽瑟逼人。置身海國。幾忘伏暑。下午四時同鄉瞿寄齋招飲於神田。譚甚暢。言及東京留學界。品類不齊。可分爲四等。第一等苦志求學。趣向遠大者。第二等絕無學問。附和革命者。第三等淺嘗涉獵。即思誑人。趕速成班回國。而充教習賺財帛者。第四等終日間蕩。喜作冶游者。予聞之。並有組織小報希謀生計者。有謀充繙

譯藉圖錢財者。有不入學校專來游耍者。有不識丁字者。有因案而被警察拘縛者。中國時勢積弱。已臻極點。留學生一線光明。爲前途之望。其責任之重。關繫之大。非尋常比。而蘭芷蕭茅。紛物不辨。足壞全體名譽。必督撫嚴考而遣派之。監督悉心而察視之。乃爲可矣。警察範圍至廣。保安警察管理結社集會出版等事。故著述印刷一書。既署著述者姓名。並署印刷人姓名。又署版權所有四字。準專賣。禁翻刻。其必署著述印刷人氏者。以出版物倘有違礙治安妨害國家之處。罪著述人。而並罪印刷人。以便於稽查也。署版權者。歸其保護也。至言論自由。亦有界說。若專與個人爲難。或礙及朝廷官闈之事。或敗壞安甯秩序之言。警察得而干涉之。禁止之。若但大概縱論時局。並無專指一人一事之言。警察不能干涉之禁止之。國家且藉此以爲鑒戒之鏡。所謂言論自由者。蓋若斯也。日本長岡子爵以同文同種爲主義。凡我國來東調查游歷人員。與晤。頗肯盡心指導。故組織同文書院於東京。組織東亞同文會於上海。皆長岡氏提唱。而日人尼之者不少。故自長岡今春逝世後。此派遂微。彼考察政學各人。不能若昔日之易易矣。鈴木常松編纂之日本現行警察法規一書。並附採法學士田邊慶彌之

法律經濟詞典。上野貞吉之法律名詞。及諸家之學說。爲讀法律者之寶筏。惟所載皆天皇勅令司法省內務省訓令。而警視廳令不載。(此言總監所命者)晤警視廳新藤君。知警視廳各項詳細規則。詳載於警察法令類纂中。現袁慰庭宮保向日本購數百部去譯成漢文。九月出版。凡辦理警察者當家置一編矣。(日本巡查且無人不懷類纂一部爲研究辦法之用)日本各種學問。分界深細。譬如一衛生也。有公衆衛生。有衛生警察。有衛生學。不知者以爲皆衛生也。而界說絕異。一警察之遺失物。埋藏物。漂流物。自表面觀。歸入會計課無疑。而歸入刑事課。以其中含有偵探性質故也。裁縫屬用度係。營繕屬會計係。用度出納等係均統屬於會計係。其中分合俱有界說。並非望文生義。任意爲之也。

初八日 陰雨涼甚。上午留學警察員曾梧軒。遇賢文肇慶尊輝。李藹雲。繼與來談。午後赴神田書肆閱購書籍。帝國百科全書。是一大帙。中國譯行者。僅一爪而已。日本律東文各籍定價甚廉。值過昂則阻礙全國文明之進化。故禁之。因購法律學校所刻之刑事訴訟民事訴訟法講義。漢譯之憲法全書地方行政法釋義等書回寓。

初九日 暢晴。午徐性安傳篤楊荔珊玉森來談。並送到警監總會規則數冊。晚偕友

潮明池黑木赴日比谷公園音樂會。聆唱各國軍歌。每歌一闕。合掌聲如連爆不絕。聲音之道。感動人心如是。此會每禮拜開設一次。是日來聆有三千數百人。人叢之際。寂無喧狀。人各讓路。絕不擁擠。於是歎曰人之能自治而有道德心。

初十日 晨九時赴芝警察署。覽第二消防署。試演技術。望火樓上見有火警。用鐵管傳音到室。或用電鈴。一刹那間消防士消防夫駕馬裝機。馳赴消防線內。樓高七十八尺。從下而上。最速二十五秒。可至梯頂第一層。消防習練。約一分五秒。預備完整。演裝水線狀。皮帶用管與小銅螺旋。準可隨意接續。又人力機筒車。簡便可用。上年東京監獄署製。其裝管接帶。祇須三人。一消防士呼口號。消防夫三人依令行之。（車有木輪兩個。）中國可仿效也。消防署長導觀消防機關士辦事室。室有非常報知機一具。非常報知番號表一冊。消防本部設警視廳內。有部長一人。庶務課長一人。課員一人。器械課長一人。課員二人。第一消防署有署長一人。署員四人。此為第二消防署。設署長一人。署員四人。消防機關手一人。部長一人。放水專長四人。火專長一人。調馬專長三人。消防調馬手三人。消防手分。等第此分職人。數之大畧也。（各署人數事務以芝區淺草區兩署為最繁）赴新

橋觀管理火車場規則。有派出所一。係專管鐵道交通事項。與他處派出所不同。設部長一人。巡查四人。每日早四時三十五分到所。晚十二時二十五分回。此時所內無巡查。以火車至十二時皆停故也。巡查每日二時勤務。一時休息。有貴族高官來往。報告警署。有停車場勤務一覽表。另有逐日報告表每人將逐日勤務事項注單上。蓋用名章。並有日誌一本。按年一報。警署每日有警部來所查閱日誌簿。晚間警部至所者尤多。以鐵道起卸時。事繁人稠。故鐵道取締規則時注意焉。午後偕友潮吉原赴橫濱。

十一日 九時赴芝警署。觀巡查教習所。操演體操外。並教練巡視道途法。如寫鉛筆。籍、吹警笛、放捕繩、等類。一一習熟。次觀講堂。地甚窄。值是日考試巡查。次寢室。每室七人。有十五室。每日洒掃二次。係巡查自己勤務。兼使習練茹苦。為將來辦事用也。次庶務室。(日本各署各校會集勤務之地名庶務室。與中國之專派一人名曰庶務不同)。警部藤井秀雄為言招考巡查法。每禮拜二次。每次應考約四五十名。試以圖畫算學作文。三者不合。不加試。合式者覆考歷史地理寫字刑法刑事訴訟法。合式再驗人格身體。得保證書。乃得進所。考準進所。由教習挑選優者三人為領班。以裨教習之不逮。

每日巡查五時起檢拾被褥。六時早餐。七時上課。七時至八時警察法。八時至九時警察體操。九時至十時刑法。十時至十一時刑事訴訟法。十一時至十二時仍警察法。此項功課較多。現因炎熱。下午停課。內分三班。三分之一輪流勤務。與派出所甲乙分班勤務同。每日下午五時後出外游息。六時回所會食。七時至八時沐浴。八時至九時溫習。十時就寢。每日自晨起時至就寢時。中間不許入寢室。教習所內。紀律之嚴。與軍隊同。有損壞紀律即懲罰。教習所所長一人。其下警部二人。巡查部長五人。在操場時。部長教以操法。在講堂內。教習講各門警學。教習有另請者。有辦事警官兼充者。警察書記二人。雜役四人。厨夫八人。巡查在堂時月薪資六元。庶務室內一席。教刑法。一席。教操練。一席。會計。萃在一處也。十一時赴警視廳補觀警察陳列所。有各國警察官寫真圖。日本歷來辦警務人物真影。各種警察所用遺留器具。前科者寫真圖。(即曾經犯罪人影片)看法圖。(新藤君云。犯罪人面貌。有年壯年老時之異。有無鬚留鬚時之異。有一人同時兩影片絕不相肖者。有分明兩人而貌絕相肖者。甚難辨。惟看法可別之。)日本五十年前消防禮式圖。(當時名義勇消防。尙未)防煙裝具。救助袋。救助索。警鈴。防煙眼鏡。覆面石綿壁。水管繃帶。運水車。(每年到公園地)大久保被島田一郎刺死之刀。兇犯藥死

人之水瓶。盜殺人時手中提攜之鐙各國消防器圖。美國紐育消防用之水上船圖。(救輪船失火用)美國消防用之馬匹熟練圖。(平時習練至臨時馬知走御不煩人力而行也)前年美國聖路易博覽會。開警察協會。需看消防上圖畫器具。室中各畫圖物具均送陳列。故警視廳有警察協會報告。每月發行一冊。凡警察界上事詳悉調查載入。鄉間警察巡查。不能詳告申說事項。可登錄協會報上。其監督即內務大臣。兼管即警視總監。總理即警視署長等官。室內第一部古今警察官制服裝具圖。第二部著名警察長官之寫真圖。第三部警察制度變更各圖。第四部刑事偵探部出品。第五部犯罪人偵探古今方法。第六部古今警察官廳大形寫真圖畫。第七部警察歷史上參考圖。第八部犯罪之種別。第九部犯罪豫防方法之圖。第十部邪惡畫像。此外有三十年前警察用之刀劍器械。偽造之鈔票。柏林消防博覽全景圖。柏林消防署非常報知機圖。柏林消防馬車出發之圖。柏林路上火災報知機圖。獨逸義勇消防隊圖。柏林消防之蒸汽唧筒圖。米國市俄古消防馬車習練自走圖。維約河水泛濫之際消防手水防盡力圖。維納消防出發之圖。維納消防手之署器械體操圖。米國紐育器械梯子行使之圖。奧國維納消防司令長官訓示

圖。英國倫敦消防圖。大坂消防圖。米國三十年前シカゴ市大火獨國六十一年前シブルグ市大火圖。獨國警視廳圖。佛國巴黎車馬交通圖。瑞西消防圖。獨逸義勇消防圖。凡中國天津湖北各警察署圖。俱與印度韓國並列。覽之尤覺心悲。日本摹仿泰西。廣行陳列圖畫品物之法。以爲比較。以驗進化。用意之深。類如斯矣。午後五時偕性安友潮明池赴日比谷公園松木樓西餐。漸至麴町區購入場券覽遼陽奉天鐵道觀戰圖。用法用光學攝入影片。室內燃煤火運動汽車。人坐縱覽。彷彿似之。

十二日 晨八時赴日本家畜市場株式會社白金屠獸場。覽宰牛豚法。進門事務所管理各項出入也。次觀搬運所。宰後收置所內。以便荷車分送。車式有兩大輪。上一長方木櫃。四面遮蓋不露。屠宰與中國法不同。每牛一頭。用木棒向腦一擊。牛即墜地。解剖後送檢驗室。屠宰室長二十七間。廣五間。(每間六尺)牛分有病無病二種。有病者置病牛室。宰後用消毒藥水消去。爲肥料以耕田。檢視室每日由警視廳派獸醫一人。係廳內第三部官。晨八時來。午十二時回。巡查部長一人在旁察視。晨八時來。午十二時回。派出所。凡檢驗牛肚腸肺帶紅色與肝有蟲者。即不準賣。無毒者驗後用木片作記。

號。繫肉上以交搬運所。牛骨另送其他公司充肥料之用。牛皮送櫻組公司。牛進門先驗一次。有無病先用木片記號繫角上。然恐外面無病。裏面有病。所以宰後仍送檢查室。交獸醫逐細剖驗。次宰猪羊室。猪肉中毒用顯微鏡檢驗。東京屠宰場有二處。一在北豐島郡箕里南千住町。一即在此。每日牛宰四十頭。猪四頭。去年東京市宰數計牛八萬四百十五頭。馬二頭。豚一千四百九十五頭。本年白金屠獸場屠畜數。自一月一日起至六月末日。計牛一萬七千八百四十三頭。馬二頭。豚三千七百五十五頭。屠獸場規則。定以警視廳令。有取締法。其屠獸手數料有定則。牛一頭一圓七十五錢。馬一頭一圓六十錢。羊一頭七十五錢。豚一頭七十五錢。各手數料內。含有屠殺稅。此屠獸與警察之關係也。今日人人言立憲矣。甲云各處教案太多。行立憲政體後。民教之案可少。乙云立憲國有信教自由。恐教案更難辦理。予謂國家不立憲則已。既曰立憲。則一切制度法令。俱合憲法之範圍。分立法行政司法爲三權鼎立。開國會議院。行地方自治。至改正條約。收回領事裁判權一節。作爲正當預備之對付。一面編纂新法典。實力施行。程度既進。外人允改條約。而教案自可無慮矣。晚八時湖北漢川留學生李

贊臣游來談。係官費肄業弘文學校已卒業普通者。

十三日 閱法學博士清水澄所著之憲法篇。雖專論日本憲法。而參攷各國憲法比較異同。理論事實兼而有之。其學說非民權說。亦非極端君權說。有參互折衷之美。無偏重畸輕之弊。爲日本憲法中最善之本。午後六時市川阿蘇次部招飲於愛宕山館。十四日 晨九時赴淺草區警察署。並檢疫事務所。淺草警察轄地最廣。公園妓院觀物場最多。風俗警察。管理尤備。署長田景辰是日適有事。一警官代署長詳言大概。淺草署事務與各警察事務不同者甚多。且有各署所未備者。譬之芝署有芝區之辦法。淺草署有淺草署之辦法。因地因時。各適其宜。不能強同。警視廳管理東京一府警務。淺草京橋兩警察署下有分署。以外警察署無分署也。分署長係警部。淺草署外有三分署。署內有警部十人。三人充分署長。七人辦各項事務。十人中分兩種。在外辦事之分署長三人。互相更替。間日輪值。署內七人亦互相輪替。署外辦事之警部。下有巡查部長十二人。辦地面上事。兼管派出所巡查勤惰。在署外管理地方事務之警部。其所應管察者。巡查及風俗交通衛生等事項。此外有管理營業警部。其下另有巡查部長。

至在本署內管理營業。有書記二人。民間營業應管理者。惟淺草區較繁多。本年六月末調查表可覽。各項營業歸本署取締者統計一萬六百十八家。有巡查一人。每日調查。管理風俗營業巡查。服尋常警官裝。更有暗密巡查三人。服日本舊時和衣。不使人知。遇有私鬻淫者。即帶送警署懲辦。淺草區游觀人衆。小竊亦多。管理此項巡查有二。人。管理妓室有秘密巡查一人。每禮拜妓院驗病一次。醫生四人。由警視廳派。除禮拜日停驗外。日日檢驗。如有毒病。扣留不許迎客。送病院醫治。經費由主家出之。大約驗有染病者。二千人內有二百人。蓋十分之一也。某警部云。娼妓泰西亦所難禁。反不若官爲許可。而密鬻淫之事。可以減少。一則風俗可以整理。一則人民可免傳毒。此東西各國文明之辦法。雖歸於營業警察管理。實包括風俗警察衛生警察在內也。妓院之設。限以一定地所。恐礙風俗之故。此淺草署管理法與各警署不同之大概情形也。導觀事務集合室。有管理違警罪稟告之座。管理會計之座。管理索引之座。刑事巡查室。高等警察室。留置場。審問室。規則大略與芝署同。人數則較多。會計課書記上設警部一人。日本警察會計。皆有警察。學者方許充當。所用必本所學。道固應若是也。市川云。

警署派出所三人。其辦法大概與武昌同。但日本巡查有二種。一係每日赴署內聽派。一係自己赴派出所。日本警察尙思改良。昔警察署有三十餘處。後裁成今數。現擬仍應展拓規模。前者日露戰爭。未遑言及。此後內務省又思大加增改。俾歸完善。以日本警察辦法之妥善。而如市川云云者。尙求進步。警察固須參酌地方情形。(即一東京府芝署與淺草署辦法不同)而其辦法恐亦無止境之時也。漸市川導至柔術廠後面觀載穢桶馬車。穢桶十餘具。置車上。桶蓋用木條裝好。不使穢氣洩出。中國擔負肥料。公然行大道康衢。習焉不察。實非文明辦法。講衛生而潔道路。警察應整理之。此尙不難更改仿效也。巡查薪金甚微。現內務省因其服務勤苦。議每人每月加至十六圓之譜。午後赴新吉原地衛生組合事務所。即娼妓身體檢查所與取締事務所也。室內清潔無纖塵。有院長室。(學士寺田織尾所居)庶務室。治療室。研究室。手術室。(係用力器割割)試驗室。入院患病者扣所室。浴室。藥室。醫室。驗病秘室。每日警視廳派醫生四人。到院驗病。有檢查台簿。照片片名。姓各項察視表。(娼妓有代替冒險。希圖不來。故每表一紙貼寫真一片。姓名年歲一望可辨。)驗具器係銅質。長約四寸餘。形如鴨嘴。驗時先用麵糊潤漬器端。然後入生殖器。驗室有石炭酸水。硼酸水。四五瓶列架上。

臨驗時持票來室。分先後次序。驗病驗座。約離地高近六七尺許。醫生在下。一望而知。驗座前後。圍以白布。不許外人窺視。驗畢用石炭酸水消毒。進院檢驗時。醫生蓋章於表紙。驗畢醫生復蓋章於寫真片表紙。每月將人數病目統計簿表。報告警視廳存查。(進院檢驗時。無病者醫生蓋章於表之上。有病者蓋章於表之下。)檢驗之室。清潔尤甚。一娼妓檢病室。而規則研究至此。中國之醫淫婦。死於徵毒淋病下疳剝脫等症者。每年不知幾多人矣。漸赴公園旁觀物場。考其取締之法。觀物設有定所。限地在淺草區。劇場必使其室宇寬整。合警察所定規模。有非常口。蓋預備火災等事。得以旁門出入也。貸座敷屋即妓院取締。其房宇亦必使合警察所定規模。寬大開爽。人繁事雜。最易多意外之事。故消防器具。必令預備。以防非常。此警察取締觀物場貸座敷等處之規則也。

十五日 晨九時赴京橋區水上警察署。晤署長警視矢野元三郎。偕至署內武術廠演說。此次市川君同諸君來考驗水上警察。予心甚喜。茲將警署辦事大綱略言之。水上警察署歸警視廳總轄。東京祇有一處。此外有水上警察分署一所。在荏原郡大井村。有水上警察派出所二處。與各署派出所規則同。另有派出所三艘。派出所派出所。性

質相同。不過一在陸上。一在水上而已。署內設署長一人。以警視派充。其下有警部三人。三人內一人充分署長。二人在本署辦事。水上警察所管理。係水面上事。設輪船技手一人。輪船船主二人。機關長二人。下有巡查七十三名。書記九名。水夫七十二名。小使七名。署內有輪船一艘。用洋油發動機器手一名。小輪九艘。救命船一艘。水路巡查民船三十八艘。凡水面上大小船筏行駛地方。警察均要察視。(水小之港不管理。統理地方。約有百二十八海里之長。水上警察主義。與各地方警署同。橫濱大坂門司長崎各商港交通地方。俱設水上警察署。雖辦法微有不同。其保護水上治安主義則一也。東京署所管水面較多。民船商船。裝運尤繁。水署若不加意保護。各船不能搬運。於國家經濟界上。便要喚虧。故水上警署專以保護民船爲最要務。水上管理水面上船。凡輪船民船。每日約有三萬餘艘。每船上以三人合計。共有九萬餘人。良莠不齊。易肇事端。所以警察必周密審視。加意管察也。矢野君所述大概若斯。至警署內辦事。巡查巡邏水面時。遇有外國船進港。必詢問此船來自何地。船上何人何貨。何地出貨。何處去銷。一一無誤。謂之船泊臨檢法。又日本人每於盛暑之際。海水游泳。多者三百人。少

亦百餘人游戲洗蕩。共二十五處。幼年學生稍或不慎。致傷身命。故地有定所。年有定時。俱歸警察署管理。又水面熱鬧地。人物萃集。易滋事。巡查當檢察。不許多裝客。多載貨。量船而行。見有漏船做筏。即禁止裝運。或違背不遵。必當懲罰。此水上之保安司法兩警察也。水上派出所派出船。巡查巡邏水面。分兩路。一大線。一小線。小線者應加意巡邏。大線則每日巡一次。或二次。巡邏之法。每一船巡查二人。每人駕駛一時。互相更替。此係小巡船也。陸上巡查。每日二十四時。必有十六時勤務。水上巡查。每日二十四時。必有十五時勤務。警視廳有水上取締規則。汽船營業取締規則。水上雜業取締規則。船泊法。河川法等。此皆水上警察辦事之法規也。(船泊法河川法係國家勅命之法律頒於現行規則中) 閱水署事務室。署長座。警部座。巡查部長座。會計座。書記座。管船者座。辦事分門。萃合一室。有扣留場。(一名留置場) 保護室。(保護夜間路上醉漢醒後即令其歸家) 問審室。寢室。(係警部及巡查部長隨時居住) 巡查憩息室。電信係室。署外有票報人代書所。(一名民控所) 武術擊劍廠。署長與巡查會議亦在此。船具室。凡汽船民船機器槳櫓等物。存置於此。外隙地。即巡查點名場也。署內房屋不甚寬拓。而迎河川。取其利便也。偕矢野君坐署內小火輪。赴那元河隅田川多摩川。徧處觀覽。

矢野君沿途指告。隅田川內見陸上海軍大學校。農桑務省。川前面有輪渡便民。不取費。係東京市公家經費也。兩岸木圍處。禁泊船。恐損壞也。見陸上皇家離宮。每當櫻花盛開時。日皇於此賜宴內外貴紳。各國親王蒞止。亦居此宮。市川云。昔年貴國倫貝子來。即宿此。當時警署派各民船小火輪圍守保護。此處一帶水面。河海交衝。最危險。不能聽人游泳。警察必當干涉之。出川河見海灣礮台。市川云。礮台左右地方。與陸上芝警署相連。應歸芝署管轄。以其在水面上。故歸水上警察。過品川汪洋一片。將出海灣。與市川矢野君坐船顛。曠覽遙矚。東京府市全景。歷歷在目。波聲浩蕩。頗拓心胸。海灣一帶。每年海苔一項。可出六十萬金錢。蓋日本瀕海立國。通國地方。一道廳。三府。四十三縣。加以臺灣。雖祇及中國四川一省之大。而海權甚爲擴張。既有臺島。又有旅順港。勢力範圍。駸駸乎握東太平洋之海上權矣。論者往往謂中國地大物博。日本國小民貧。殊不知地大而海口之門戶全失。物博而地面之生產不講。較諸領有海權。發達工商。不可同日語矣。未幾輪舵撥回。過隅田川兩國橋。覽水術教場。分爲兩岸。一岸年稍大。一岸尙幼齡童子。教習亦立水中。羣集游戲。分班施教。各樹學校旗幟於水上。於以

歎日人體育之發明爲不可及也。(練習場。並懸救命圈。兩具以防危害)舍輪上陸。在水署後面河中。矢野君導觀派出船兩艘。染白色。艙位兩小間。甚潔淨。救命船一艘。不甚大。色白船首尖。救火船一艘。與派出船式同。在水上見各船有火災之時。巡查水火夫。立即駕駛馳救。此水上消防也。又一室門外懸木圍一方。題暴風警報信號標所在地一覽表。亦水署內附屬研究之處。晚間大雷雨。竟夜涼氣襲人。

十六日上午武進同鄉劉北禾。動驛來談。劉已法政畢業。考入西京工業大學校者。爲予言中國人文學稍優者。多具法政性質。而不通科學。雖進校三四年。祇完全一普通資格而已。日本學生帝國大學畢業後。仍赴西洋留學數年試驗。然後歸而大用。中國學生來東。極其五六年之學力。其程度尙難希日本未出洋之學。生留學東洋。已落次乘。出於不得已。況并其次程度而尙去之甚遠乎。甚哉難言之矣。午後赴牛込區振武學校。晤校長福島中將。振武即舊時士官學校地。因人稠不敷教授室之川。將士官學校另設他處。校內學生多我國人。在振武畢業入聯隊一年。再入士官。此爲士官之預備學校也。校舍締構雖形簡單。而精神甚有可觀。福島君導觀講堂七處。(一講堂以三十人爲度)

均設樓上。取其光線。樓下自習室寢室。相間位置。寢室一間八人。樓房最新之一棟。福島云。此係新建。貴國練兵處撥寄經費四萬圓而構造此樓。以培植陸軍學生也。觀第六班講堂。蒙古王土爾扈特王亦在內。設一特別座位。桌稍高。日人以此爲優待。予謂學校爲磨礪人材之地。非論貴賤階級之地。俄大彼得曾親入工廠充藝徒矣。歐西未聞特置座次。日人豈不知耶。測知人之性情而爲此。皆是可怕處。蒙古王稍有識見。決不願坐此特別位也。校內甲乙丙三班。業已畢業。因入聯隊。須至陽歷十二月。仍在校溫習課程。次閱圖畫學講堂。不定班次。輪流入內授課。次標本堂。次理化器械室。次理化學講堂。坐位用層梯室。以便各覽講臺試驗。梯分三排。中空兩小梯。上下布置甚精。學生入講堂。不穿革靴。用草履。除在寢室外。行動必戴帽。每入門必鋪棕氈鐵架。以備陰雨時。各生入校。先將靴底泥濘向鐵架括去。再向棕氈揩拭潔淨。方入舍。飲堂寬。甚舍監一座稍高。飯蔬每人一分。米穀內雜以麥粉。取其易消化而練茹苦也。校中設學監一人。(即監)舍監十餘人。(即監)教習十餘人。大概舍監一人。管理學生三十人。學生六百名。約用齊役三十人。(齊夫僕役一人兼數事)自習室寢室內掃塵。學生分班

自理。

(中國學校各室內均齋走。收拾學生遂養成驕慣性)

學生學費。每人每月繳二十五圓。校內每月給學生零用

三圓。

(十天給一圓分三次)

衣服每年三套。靴每月一雙。在二十五圓內扣。繳學費等事。歸各省

監督料理。監督處另給學生每月五圓。

(三圓四圓不等。各省酌量辦理)

練兵處派有陸軍留學生監

督一人。經理學生會計事。校內課程。以時酌加。初入時期。算學日語體操圖畫。後尙

加典令幾何化學三角要務令講話等課目。日語尤重。取其能解語言。方可直接聽講

也。

十七日九時赴芝公園。觀第二消防署蒸汽唧筒實地試驗法。市川先在守候。未幾數

人將人力汽筒拖至。火龍馬車飛至辨天池前。先演試人力汽筒。繼演習火龍蒸汽筒。

人力汽筒。力足時射可三丈餘遠。火龍蒸汽筒。力足時射可十餘丈遠。機力動時。水聲

鼎沸。如雷霆震響。機關手七八人。火輪回轉之數。一分時可百五十回。極力運動。一分

時可二百五十回。轉愈猛疾。水力愈遠。機輪轉撥。管力漸微。洵消防利器也。漸赴東京

電車鐵道株式會社。管事員導觀聚車場。大小電車集此。大者可容百餘人。有修車隧

道。車輪下面破損。架隧道上。人立隧道中。晝夜燃電燈。照以修理。次電車廠。(又名車庫)有

運車一乘。電車不能轉折逆軌道出入。用運車載之以行。運車行動。電車隨之。法至巧便。次電車工場。次消火栓器具置場。次造電車鐵輪廠。次修電車木廠。(係各項木料等物存置之處)次發電所。熱氣蒸騰。電汽總匯地也。次電路工夫詰所。營繕工夫詰所外有事務集合室。電車公司創於明治三十六年八月。東京府有三處。一東京電車處。一東京市街鐵道處。一東京電氣處。品川有發電所。由此轉達送出。此歸交通警察管理也。觀芝金杉町東京瓦斯株式會社第一製造所。製造自來火。東京三處。一深川。一千住。一即此也。管事人導觀燒炭製火廠。總火管長二十尺。內盛焦炭。總火管出火。布入小火管。散各處。煤炭箱懸之高處。燒過後用運動機車裝漏搬出。火由室內傳達於管。管大小不一。每日共燒焦炭六十噸。器械室機兩座。皮帶管兩座。運動以送自來火也。一小間係洗濯總器室。機筒口周圍八尺。筒身長丈五尺。內盛水以洗火機。有皮帶運動。次觀計量器室。汽管內火若干度。覽火表即辨。次洗滌器室。用涼水洗自來火機器。有轉軸不靈處。涼水機軸轉運。自能洗滌乾淨。此機購自美國也。次繫氣場。鐵座四具。內有火。次貯氣場。內盡是火。圍管大者盛火六十六萬英尺。小者盛火二十萬英尺。次觀可爾他油

池。東京瓦斯公司資本八百四十萬圓。年有虧損。而不能不辦者。以其爲利民便用。故國家貼補助金維繫之也。午四時赴本鄉區留學生會館。伏假學生一班講授日語。一班講授音樂。頗尙用功。予於館中購新書四五種。

十八日晨九時赴司法裁判所。晤部長伊藤久次郎。演說裁判所之次第。日本裁判所。規仿歐洲。分三級審。不論民事刑事訴訟案件。第一級命令不服從。或聽斷失公。可訴諸第二級。第二級仍然。可訴諸第三級。第一級爲地方裁判所。第二級爲控訴院。第三級爲大審院。違警罪犯。歸警察署先行審問。重者送裁判所內之檢事局。檢事詳細訊明。送判事。判事再於法廷問罪。遵法律公斷。此第一級地方裁判所事務也。(第一審判事一人。書記一人。書)民人被告枉屈。可請辨護士申辨。裁判官不能任法。一依法律規定。有時亦應聽從辨護士也。辨護士資格與裁判官等。判事檢事書記辨護士。皆穿藍青布法服。領緣以繡花線色分別。判事花線紫色。檢事花線紅色。書記花線綠色。辨護士花線白色。當裁判時。管理犯事人有看守官巡查官各一人。裁判不服。準訴第二審控訴院。(第二審判事五人。檢事一人。書記一人。)不服準訴第三審大審院。(判事七人。)將第一審第二審裁判。公同會訊。以

求信讞。此日本裁判分三級審之制也。(以上刑事裁判)至民事裁判。亦分三級審。民事與刑事裁判不同者。惟不設檢事官耳。其餘均同。(以上民事裁判)伊藤君云。今日地方裁判所正在審問。可以試觀。此爲代天皇行法律之地。各人均以整肅爲主。現當暑氣節候。不行大審也。至地方裁判所之刑事法廷。有問官五人。所穿冠服。果如前言。犯人有坐位。訊時立起站長桌前。裁判官平心靜氣。如尋常人對面語。犯人盡情剖辯。無絲毫畏懼色。判事無絲毫壓制。裁判長一人坐中間訊問。檢事書記坐兩旁。辯護士另案坐前。並設傍聽座。法廷旁有會議室。係判事檢事等官審問時商議處也。書記即中國刑房之類。中國以靈劣房書充之。日本以嚴正人格充之。(穿法衣身分並高且皆諳法學)此其差異點矣。一案之來。判事長審問。辯護士辯駁。另易判事再審。準辯護士再駁。必求當於法律。民無枉屈而後已。並準各新聞社員派至公廷鈔錄案情登報。故大審院控訴院地方裁判所法廷。均設新聞紙記者座。各室導觀畢。伊藤君又云。日本昔時裁判。民事刑事。混合不分。有時判斷。用野蠻手段。至今日則皆用自由思想矣。司法警察。遇有犯違警罪人。重者必歸裁判所處理。蓋恐警察無故拿人。或有挾嫌。或有失察等緣故也。警察依法規辦拿。

罪人。裁判所亦易辦理。故裁判與警察有密切關繫。必警察辦法完善。而裁判辦法亦得完善也。凡犯罪有憑據者。悉照憑據科其罪名。(與中)定結一案。不過三四日。從無延長拖累之虞。此維新後改革制度之效果矣。案日本憲法第五十七條。司法權於天皇之名。依法律裁判所行之。裁判所之構成。以法律定之。故裁判必依法律。法律爲裁判單純之準繩。君主不能自施行裁判。而使裁判所宣行之。此司法獨立之權。又憲法第五十八條。裁判官以具法律所定之資格者任之。故裁判官皆有法律之性質與資格。判事檢事既必受試驗。或三年以上充當帝國大學法科教授。或三年以上爲辯護士者。方能充任。辯護士亦必經試驗。能於各地方裁判所登錄名簿者充之。自地方裁判所。而控訴院。而大審院。各官無不具法律完全之資格。依規於憲法第五十七八條行之。故官無枉法。民無冤屈。辯護士者。所以範圍判事檢事。恐其濫用權力。而代民伸辨。使一一歸於公允正當也。中國憲法既未能立。法律大臣奏請用刑事訴訟法。民事訴訟法。無預時之準備。行政司法。不劃然分析。刑事民事之訴訟法。即難於施行。政法必有完全之機關。而後可以執行。此東西各國之已事矣。

十九日 閱萬國比較日本憲法義解。是書譯自伊藤侯帝國憲法義解。伊藤侯曾爲憲法起草員。故所著極精確。譯者更參考諸家學說。擇萬國憲法條文之重要者。以示異同。藉資比較。足供研究憲政之資。傍晚擷雲同年來談。並云中國在日本留學帝國大學專科畢業得學士文憑者。始於本年工科畢業之浙江何某。昔年有在帝國大學三年由預科高等升入。名曰選科。卒業祇給以修業證書。不能得卒業文憑也。中國陸軍向不準入大學校。現由練兵處與日本陸軍省大臣商議。此後中國留學士官學校卒業者。準與日本學生一律相待。擷公畢業振武。將入聯隊。再入士官。以爲預備入專門陸軍大學地步。（入大學後應分科。或砲兵。或騎兵。或步兵。或工兵等。分門學習。乃稱專科。）中國不少監司大員。能如梅公之儕身卒伍。官習掃盡。堅苦卓絕。爲難能矣。

二十日 晨十時偕吉原赴赤坂區青山練兵場。閱第一師團騎兵操演。疾馳縱橫。無不如式。獨國某統帥來觀。贊歎不絕。戰勝露國。良非偶然。晚直隸留學生成捷臣。貞敏來談。成留學警視廳二年。頗有程度。擬於警監總會內。組織警察雜誌。月出一冊。爲聯絡內地辦理警察之機關。予頗贊成。

二十一日 晨九時乘電車赴品川警察署。觀鄉里警察管理法。晤署長警視白石愛

人君。旋囑一部長陪同赴鄉。至入新井村入新井巡查駐在所。(設於東京市內曰派出。品所設於鄉里曰駐在所。)川警署設派出所九所。駐在所三十三所。駐在所勤務祇一人。每日勤務以十六時爲度。分晝夜。不能如派出所之間日休息。限每禮拜休息一日並有并此一日不息者。駐在所常與隣所聯絡。互相稽察。每日須會晤。即以沿途巡邏到鄰所之時。爲彼此會談商量辦事之時。此所管理約二百五十戶。人口約二千至二千五百名。按地方戶口之多寡。酌設駐在所。地方有盜竊等事。赴所報告。巡查必詳細詢問。勢或一人不能辦理。遂會同鄰所協力從事。營業每月調查一次。遇有賭博等事。每月調查六次以上。驗疫之時。尤宜注意。有患傳染病者。囑另遷別室。有一定地方。外來貧民居住。亦有一定地方。或有暴死等車。當細細考問。是否病死。或係殺死。或係自盡。必請檢事司法官察視。總以死法有無關繫爲斷。巡查驗過後。將姓名年貌開單報告本署。地方如有火災。由巡查察視如何失火。報知本署。無論天然火人力火。均應用消防。須立時電告。其電機傳報。有一定記號。無論本所鄰近所。皆應會同設法。由巡查帶同消防所火夫。到救火場撲熄。鄉間巡查無年限。或充二年三年均可。既不論替。故不定年限也。旅客到鄉染病。

如在本署最近地方。即帶到本署。本署將病人交市町村役所。如不在本署近處。由巡查交市町村役所。有遺失物來報。巡查寫單送本署。每月十八九日巡查赴本署一次商議。初八九日赴本署講論警察法規。或署長有事面告。二十九二十日在本署學柔術。正談問時。忽有一巡查自鄰所來。持函報幾件。述前日勤務各項。此所巡查亦告之。所謂互相聯合之法也。巡查前日之勤務。次日一時前須報告本署。用郵便寄達。遇急事用電話告知。民人養犬。須報警署。方可保護。凡檢查旅館飲料水等營業。及平常各項。巡查可一人專主辦理。辦後告知本署。此駐在所之權限也。春秋兩次行檢驗清潔之法。駐在所與町村役所商議。到各戶房屋。徧處檢驗。地版蒲席之下。抽開細檢。灑以石炭粉。廁所及不潔之處。亦用石炭粉灑之。土井一年檢查一次。不潔或淤塞者。必疏濬之。有傳染疫。速報本署。用消毒方法。或石炭酸水。或別項藥水。人則送入避病院。其經費由市町村公所籌也。（倘家有經費。辦法尙能合於衛生。亦許不遷避病院。）又有密查旅館之法。突然於每日晚十二時。赴旅舍查察。有無藏匿非人。有無密賣淫。本署有監督巡查官。凡派出駐在兩所。每月查理七次。以防疏懈。又所內巡查見地方上有前科罪人居住。平時當細察其行。

爲此駐在所管理一切之情形也。講論既畢。巡查將各項勤務表簿檢出一戶口調查簿。(姓名年貌住址警業均注於此。)二戶口異動屆簿。(民人有搬遷住所注此。)三注意簿。(各項事目帖邊際。以便檢覈。某戶某營業若干數均注此。)四駐在所勤務表。五知名簿。(凡有名廟寺名人學校病院。多載入之。)六牛籍簿。七失單表。八日誌。二十二日 晨九時赴京橋區。考查歌舞伎座。(劇場)管理法。此關係保安風俗營業三項警察。開演之先。將所演事目報告警視廳。經許可後。消防手來檢驗消防機完整否。水道疏通便利否。審定然後準演。否則警察有停止之權。劇場犯演習規。警察亦得令其停止。每開演時期。警視廳派警部巡查部長等來場管理。見有演違礙風俗者。立時禁止。見有喧鬧競爭之事。亦即時禁止。警部巡查另有座位。場內有非常口兩處。以備火災時擁擠之患。昔年美國劇場因失火而致死者數千人。聞係非常口太少故。演時有一定限止。上午十一時開演。夜十二時停止。此歌舞伎座之取締法也。漸至二十間堀地警察分署。晤署長警部齊藤盛晃君。分署設署長一人。管理地面巡查四十九人。派出所五處。所內六人者有三處。八人者有二處。六人之所。每日三人互相交替。八人之所。每日四人互相交替。署內設監督巡查部長二人。事務員五人。(即巡查部長。巡查派充。)二

人管理庶務。二人管理營業衛生。一人管理統計索引。司法警察。歸監督部長管理。分署與派出所。平時最要聯貫。尋常事有通行電話通訊。要緊事有非常報知通訊。有分署之派出所。不用非常報知機也。刑事巡查。多在本署。不在此分署內。分署經費。統歸在本署計算。故不設會計書記。至事務室所辦各事。民人報告各項。規模與本署皆。同不過畧分大小耳。赴農商務省。見二人手携皮書袋。由內步行出外。詢之知爲農桑務大臣。一日予於日比谷公園有樂門。見二人喚僱人力車。吉原謂乃文部省大臣。日本各大臣道途步行者。不爲奇事。較諸我國。位高之大吏。不論。卽州縣官出。動輒隨帶賤夫污役多名。甚或以示濶綽。其文野之判較然矣。日本政俗。擷要曰。明治以來。親王大臣及地方官儀仗虛文。一切裁除。今雖一等公爵內。閣各省大臣海。陸軍大將升。塔上馬。登火車。過輪船。不用僕從扶掖。謂己非痿痺。何必事事需人。自長怠氣。弘文校長嘉納治五郎。前年至中國南京。見官吏出入。前後僕從數十人。大怪之。稱爲世界奇事。謂飽食煖衣。不能爲國民造福。又招市井游民。奔走服役。旣不節用。又不愛人。日本官吏。與平民交接言語。和悅撲摯。藹然可親。故民無不達之苦心。茲事雖細。而於移易風俗。則

亦大有關係云。閱商品陳列館。各勸商場係本國商品。此係各國商品。陳列之。以便比較。以驗工商之進步。足令閱者生商界競智之心。而我國商品。則擇其最窳陋粗率之物。列於其中。另置一室。與朝鮮並列。標題曰清韓貿易參考室。不得與於歐美諸文明國之列。稍有國民思想者。見之能無蹙蹙。予所睹者。帝國博物館。警視廳。並此而三處。皆儕我國於朝鮮印度之列。但印度爲已亡之國。朝鮮爲日保護之國。我國分明亞洲獨立國。薄視未免過甚。而駐使絕不與聞。爲可異矣。館之第一階列研究材料品。新著品。染織工業。採鑛冶金。製作工業。水產各類。第二階列化學工業參考品各類。第三階列印度貿易參考品。機械器具。林業農業園藝。蘭陵印度出品。白耳義國製品。奧地利國製品各類。另有中國對諸外國貿易對照。及對中國貿易累年比較二表。中國商人智力。往往爲外人歎服。倘能廣興商校。練習商學。其智慧何嘗弱於西人。東西各邦之注意我國商務久矣。祇以商人無學。以致人優我絀。欲擴張而廣大之。其必國提倡之保護之而後可。午後五時市川約赴兩國橋觀焰火。登舟後漸見各船來往如織。懸旗張燈。迷目愴悅。至傍晚則弦歌四起。四面岸上。燈火萬家。人山人海。焰火品俱在船

上。霹靂一聲。演出廣告字樣。及花籃等物。灼爍可觀。但見水陸上人。每聽連爆一聲。無不歡呼合掌。京橋日本橋芝下谷淺草麴町本鄉等各警察署。派非番巡查各數十名。照料兩岸。設臨時出張數所。警視警部以下來集者。不下四五百人以上。水上警署大小警官皆來水上警戒。所以人如蟻聚。而不聞滋擾。以彼生長文明國。又當戰勝之餘。宜其嬉嬉皞皞。游於帝宇。故有此景象。我獨何人。亦集於此。遂廢然而返。

二十三日 晨九時偕李藹雲黃少珊赴神田購和文政法各書。午餐後至上野商品館縱覽。晚赴榮膺館酌叙。座中皆昔年武昌所派留學警察各員。均極暢譚之樂。

二十四日 晨九時赴四谷區東京監獄。晤典獄藤澤正啓於應接所。藤澤君爲言東京監獄。係未決監居多。皆未經裁判決定之犯。監獄各員。相待必恭。以其未定犯罪名分故也。獄內雜居房有四條。分樓上下。每間有席八張。內有二條。係一人一室。屋稍窄。有百餘間。此內係犯人之有身家。有功名者。在東京犯事人。先要至此。每年統計罪犯有八千人之數。昔時監獄在警視廳旁。明治三十六年。此監獄遂竣工。經費用十五萬圓。獄中高官係典獄。下有看守長十二人。醫生三人。教務室三人。看守一百三十二人。

女監房用女人看守。有七人。未決監犯有錢之人。可自己向外面購飯。或外面送來。或仍服原來衣服。均許可。無錢者由官給飯。每監犯一人。每年經費約八十五圓。未決監犯。在房內可讀書。願作役者聽。不強其服役。每日飯四分米。四分麥。在監作役者易餓。應多給。不作役者。一日三餐。病者給稀粥。尋常犯每餐暈菜一。病犯每餐素菜一。西人犯事者。每餐並有麵包西洋菜。平時在監千餘人。每年病斃者二三人。昔時監獄辦法。未完善。每年犯人病斃者。統計各處約有三千人之數。現在統計各處。祇數十人。以衛生之學發明故也。日本犯贖刑罪者。每年二三百人。現每年祇二十餘人。至三十人之數。在東京一府每年僅十人之數。贖刑一事。往往滋人異議。謂不可用。但今國家尙未定。每年至監獄八千人之數。五千人係竊盜之類。三千人係詐欺毆打賭博之類。日本犯罪人。較西洋爲多。至女犯則日本亦不多。藤澤君演說既畢。一看守長導觀各室。辦事室分第一二三課。第一課管庶務。第二課管戒護。第三課管會計。看守室則無論何時有看守長一人在此。旁則雜居房。房口懸犯事人姓名及番號。將姓名用活動木條蓋之。犯罪雜居有輕重之別。六人合居係輕罪。三人合居罪較重。門有四方小口啓閉。

以便外面檢視。夏暑時。此小口抽開。以通空氣。樓上有一室。居八人。看守長云。此係賭博犯。如犯別項罪。不能如此。合居人數之多也。忽見外面監犯家內送入筐一具。盛以菜。並開單。經看守員蓋印章後。方分送。其分送法。用活動運車。裹以橡皮。無些子嘈鬧聲。監房櫛比。有理髮室。內有二犯穿赭衣。教人理髮。大約四日或八日教一次。(穿赭衣監人不到一月者。滿一月者不在此內。)分房內見一有功名之罪犯。即中國所謂官犯也。地較各房寬潔少許。每室圍以木牆。均牢固。防脫逸也。房內木隙嵌以油灰。杜臭蟲也。房內各役。罪人充辦。觀犯人迎接所。凡到監看問之人。先赴看守員處領票。持票者向犯告知。然後犯人出房。至等待室。分先後次序。與外人會晤。時有看守員監視之。(等待室一小木廚。蔽以門。廚六七座。均有犯守候。不見人面。但見下面伸足者六七人而已。)次女監。見女犯二人行走。用尺長許篋罩覆面部後。一看守員隨之。次調劑所。陳列架上藥物甚夥。次醫生室。次內科室。次病監。每室均有人。藤澤君云。現東京在監一千人。病院內八人。因衛生研究。故病犯漸減。浴室分兩處。有病者另浴。次運動場。用扇式。夾以木板。分六七條。外用鐵欄。看守長在外立。一望即辨。運動場四面牆泥。色分二種。上段色紅。下段色白。以便著赭衣犯在場。可一見而知。次

分房。在運動場旁。有五六座。(相間三尺許。位置一間。)係重犯不服從監視者。次閹室。係屢違獄規。悍性不改者。場內有懸鈴亭。倘犯人逃走。即鳴鈴。分記號。逃向何處。用何記號。防備之法。可稱縝密。次工場。犯人正餐。皆著赭衣。洗衣所。各犯輪流分代。炊所有罪犯十餘人。著赭衣。坐長桌看書。浴場一人一間。甚清潔。每人澡時。並給以肥皂藥水等物。有自來水管。用火龍機運動作沸熱水。不燒炭。近年東京均用此運電汽筒矣。此係合浴室。旁即獨浴室。園內有小鐵道。以便運送車往來。可稱便捷。次調所入口。警視廳送來犯人。先到此所檢驗。有無微菌傳染等疾。驗畢。醫生蓋印章。此所有管理留置場員。凡犯人帶來衣服銀錢等物。置此。次調室。係統計犯人姓名簿室。此第一課內事務也。觀書籍室。典獄云。皆參考書。大小獄官有調查法律事務。入此室。次教務所。內有在監犯人攜帶各書。列十餘架。此所係收發給領處。分房犯準每日換書。雜居房犯每禮拜一換。携帶書籍閱畢。可交管理人準帶回去。並許再換帶入給覽。監獄工程。皆用罪犯建築。不用外匠。日本各監獄。均用此法。若外僱工役。如東京監獄。非二十五萬圓不可。以用監犯。祇用經費十五萬圓。況罪犯中并有擅長工匠者。即不能工程。聘教習教以建築法。

以二十人作一班。教以木工泥工等事。自能構造。可見犯罪人亦有可用者。前此之蹈非轍。實以未曾受教育故也。作工時不論何犯。有教習在旁指導。監獄室不尙觀瞻。但能結實堅固。簡淨疏暢斯可矣。各室閱畢。藤澤君又於會議室云。此室大小獄官會議辦事處也。室內懸犯婦臨刑雙手縛後赤體乳育嬰兒國。(係購自泰西)欲獄中管理人觸目警心。而存慈祥憐憫之念也。嗟乎。民之多辟。由於我之無教育。彼犯婦之赤體乳兒而並非不以爲恥也。其心蓋不忘嬰兒。雖臨刑綱縛至是而尙不忍不思撫育之也。犯罪小民。猶嬰兒也。監理人皆嬰兒之母也。小民因失於教育。而不知法律。而罹於羅網。在上之人。方且自怨自艾。教以遷善悔過之道。唯恐其不暇。而尙忍於刀鋸桁楊之下。逞其酷烈快心之舉乎。夏禹之下車而泣。穆王之哀矜弗喜。必使無訟。其思想皆已及此。其事將於今之東西各國實行之。吾於是歎聖道範圍之大也。午。赴上野帝國圖書館。閱覽室分尋常特別兩種。予入特別室。先閱目錄部。凡漢籍和籍歐籍存儲有二十餘萬卷。目錄有數十冊。歷史輿地算術理化教育倫理心理宗教政治法律物理美術等。各分類目。如我國四庫全書提要。需閱某種。持單向管書人取。有閱

讀者有鈔寫者。每室有五六十人。並附婦人閱覽室。其惠餉學人之法。無良於此。中國各省。未聞此舉。人民之智識窒塞。學問之難於進步。此亦其一端。乾隆時代。焦山西湖。設文匯文瀾閣。儲書多種。許士人鈔覽。維粵匪之亂。蕩焉罔存。中興後有五書局。校刻歷史之舉。士人遂得購讀各書。故世界學問之進化。皆以書籍爲轉移。(泰西各國均有儲書室。藏書樓。供人閱覽。)規仿而建設之。是所望於當軸者。閱東京美術學校。(與帝國學士院合室。)因暑假各教習設一美術講習所。管理導觀西洋書課第一教室。內陳畫架三四十具。有一十二齡女子站立架前。教師臨繪。維妙維肖。(即油畫。)肖又一室。陳白粉模形人像大小無算。詢知皆本校教習手製。校中試驗成績品。各項聞不少云。閱畢赴公園中冰室小憩。濃陰匝地。不著翳塵。林木森森。盡饒古意。因歎日本之易於進化發達。厥有由來。喬木蒼松。皆數百年前物。其自昔之講求森森學。已可見矣。德川時代。衛生學早已萌芽。其國所編古代歷史。即以地輿人種入手。其活動性質。孕育不知幾何年矣。自明治維新。而吸歐美之文化。遂如導火線。爆裂彈。一發而不可遏禦。然社會之舊俗未更。數千年來。沐浴漢人之學。根址牢固而不可拔。講歐化主義者。遂謂必去漢學。而歐學乃得有所發達進

步故明治二十年後。將實行憲法之期。幾盡棄漢學而不復顧惜。未久而甲午之役。適當其衝。開明之大僚。於廢漢學播歐學之目的。日日求其能達而後已。果自此役後。而社會大動。學界大變。漢學日見式微。歐化日益膨脹矣。此固天之欲一新東亞大陸之面。目而默察其微。在日本實抱此不能己之深心。而必欲一發之。願我國人弗但事崇拜。而不一窺其用意之所在也。晚插雲招飲於富士見町富士見軒。座中陸軍步兵特務曹長川浦重作。即前年露西亞戰役而獲功者也。梅云。江南有徵兵與警察衝突正法一事。警察皆撤勇充當。其弊無待言。而徵兵皆讀書人士。祇須訓以軍事法律。未有不可用以收效者。督練之人既未諳兵學。一以從前之待綠營兵之法。相待而尤壞於出洋一二年回國辦事之人。論軍隊非有六七年苦學。不可中國出洋。留學淺嘗涉獵之學生。在授事者以爲出洋則無所不諳。在受事者以爲出洋則概可傲視。此反不如用中國舊軍隊中之辛苦耐勞結實任事之人也。某云。此次南洋徵兵。半皆無業游民充數。宜其如此。梅又云。人之有業無業不必論。倘入軍隊而受軍事教育。雖游民而皆可潛移默化。苟督率之人不得其道。雖有業良民。亦足以滋事而有餘。如我輩無

學爲官者。即無業游民類也。梅公將入聯隊。添習野外要令步兵操練諸學。於陸軍極有心得。故能發此精透之論。

二十五日 竟日寒雨。閱日本佐竹千代吉地方自治團體與警察論。第一章論警察之意義及權限。第二章論地方自治團體之意義及權限。其云警察於內政中占重要地位。警察之行爲爲行政。行政者國家欲達其目的。以行政官府立於大權及法律之下。受國權之委託。於其權限範圍內。對人民行使權力之謂也。故法學上非權力行使者非警察。警察行動之權限。固不可超越法令範圍。然亦非悉待法令明定之。如警察官認爲害公之秩序行爲者。而法令無明文時。可不必以成見拘。而得裁量處分。爲適當之對付。地方自治團體。其根本注意在鞏固國家之基礎。以圖發達社會。如進步事務日繁。一切地方設施。必一一悉待國家經理之。不但識有未周。力有所不逮。而人情風俗。各地互殊。畫一定之成規。以律全國。其不與地方情形相衝突者。蓋寡。地方自治者。各團體各自經營其事業。而不煩中央政府之力。國家但於特殊方面。計畫其安甯幸福。故文物之進化。自措之裕如也。佐竹此論。以警察爲根諸內政法律。防官吏之濫

用其權力。以地方自治團體與警察制度。皆以保持公共之安甯幸福爲基礎。是即地方警察之權輿。自十八世紀後。警察制度已遍於全世界大小各國。其地方自治團體不能發達。吾恐警察之設。總無完全之行爲。其範圍莫由光大而擴張之也。中國法律大臣奏請行民事訴訟法刑事訴訟法。議者不一其說。甲謂中國之民程度尙淺。法律未臻完全。設陪審員而依違遷就無判斷力矣。設辯護士而刁紳劣監皆法學家矣。此時此法萬不可行。乙謂俟河之清。無有窮時。泰西各國一面更改法律。一面開通民智。法有不完。逐漸修補。預爲宣布。乃定方針。此時此法。即常備行。予謂乙說較長。考諸日本法典編纂。維新後屢有修改。刑事訴訟法修改二次。明後十年編定治罪法。十三年頒布。十五年實行。二十三年又制定刑事訴訟法。即於其年施行。民事訴訟法修改二次。明治六年定訴答文例。訴答文例。本非法典。然當時別無民事訴訟法。惟此稍爲近之。二十三年取德國主義。定民事訴訟法。二十四年實行。先宣布而後實行。其宣布之時。即爲預備實行下手之時。變動改易。作爲正當之設施。而又必國家先定憲法。編纂法典。然後各種法律可得而行。若司法行政。混合不分。而驟欲行刑事訴訟法民事

訴訟法。枝枝節節而爲之。恐終無當也。

二十六日 聖上萬壽。借愛宕山館設筵。請在東各警察教員及警視廳指導各員宴會。彼此皆誦頌詞。予在武昌時見寓鄂日人逢天長節皆赴領事署恭謁帝像。中國留學生至萬五千人之多。是日絕未聞有赴公使館行謁 帝禮。異邦留學。將來爲祖國効用。而漠不相關至此。排滿革命之說。所由滋起。而外人亦謂我邦人士絕無愛國心。端學術而愛國家。常軸者應思有以處此矣。

二十七日 晨六時赴內藤新息停車場。乘汽車至巢鴨村觀巢鴨監獄。晤典獄山上義雄君。看守長導觀各處。監房共三百餘間。先應接室。次事務集合室。次會食堂。次典獄室。次各課室。入曠場有赭衣犯十餘人刈草。閱第二課室。內設事務案十數。此處有非常報知機。看守長三人查日記。室內懸職員姓名小木牌。各員每日勤務一時二十五分。有三十分時休息。互相更代。不能同時並息。次看守室。看守人三十分時休息。即在此室。看守員白衣佩力。與警察服裝同。次觀第一工場。東部紗線紡績廠。入室軋軋聲不絕。所織布粗厚堅實。機座大者四十餘座。小者三十餘座。北部練布鐵工廠。工犯

八九十人。作工丁丁之聲貫耳。西部縫衣廠。製軍隊衣無算。工犯百餘人。每廠有看守員監視之。犯人儼如工怡。不似獄囚。皆有怡然自樂之象。次第二工場。西部木工製具室。有鋸木者。有釘及者。有測量木材之長短大小者。如一大木工廠。工犯四五十人。其餐碗各人置在木櫥。規則秩然。北部製作監獄內人川之被蓋鞋靴等室。工犯百餘人。一如大鞋靴鋪。東部手機製衣服。有製監內衣服材料者。有製皮履者。工犯百餘人。每廠懸有木牌。上書格言一二句。如吾日三省吾身學而不思則罔之類。四日一換。南部木工室。工犯五六十人。次第三工場。西部製鐵器廠。工犯六七十人。室內懸有作業督勵表。工犯身上均懸銅腰牌。室內製就鐵管各器甚夥。旁機械室。儼如製造軍械廠。對面抽絲廠。後面織篋器草帽等室。工犯皆百餘人。次第四工場。西部織布廠。機座六七十具。次第五工場。西部鐵工室。製成刀劍無算。旁製草帽材料室。東部鐵工廠。製成洋傘堆積纍纍。旁製傘材料廠。工犯皆七八十人。次第六工場。西部織藤繩廠。東部製竹器廠。後織漁網廠。獄內大工場分六處。小工場分二十四處。場後有汲水總機器。名火龍機筒。用皮帶運動。水即引灌入室。次機械發電所。夜間各監房電燈由此布運。監內

打水消毒盛水煮飯。均用電汽。犯人大小膳因其量而與之。勞動者犯規。飯即減少。其減飯之多寡。因其犯規之大小而定。凡罪人飲食洗澡。數人共行動。必有看守隨之。監房內甚清潔。有自來水管。爲滌面之用。地下鋪蓆。啓版有一方窟。盛肥料。由外面圍場開鐵小門運出。每一監房外。懸小鈴於高處。監房內或有事故。用手拉繩。鈴即作響。令看守人一見即知某號監房有事。監房外巷衢兩旁。地鋪棕氈。看守員檢行走時。不聞履聲。可密察也。監房巷衢十條。居間有中央看守室。四面在覽。此爲看守各監房之總機關處也。登樓有大室一間。供奉教主。凡佳節及禮拜日。有僧講教。犯人分班入聽。觀耕牧場。有赭衣犯十餘人種植。有看守隨之。旁有大花園。小有病者令栽花。藉可養疾而運動也。藥局分內外科。精神病犯另有居室。次屍室。凡犯人將死。置此室木牀。中間貢一靈廚。瓶內供鮮花數枝。彷彿超度之狀。閱至此而歎東西各國監獄官吏之積慮處心爲至仁矣。閱犯人接見室。(共有二三號)旁一座。係看守官坐而監視之地。補觀第二課。各員會集勤務。第三課係管罪人作工及運物也。閱畢回第一應接室。山上君云。此獄明治二十八年落成。經費用三十五萬圓。在日本各監獄。惟此爲最大。現在蓋造恐

須百五十萬圓矣。昔建築時工役多囚人爲之。獄地面有六萬二千坪。房室占有八千坪。平時每監房住六人。三排共住一千八百人。今日在獄囚人共一千九百六十人。管理囚人之員。典獄一人。看守長十五人。建築師一人。繙譯一人。醫生五人。教會室五人。看守員二百零三人。作役教習九人。共分五班。監內第一課管理往來一切事務及犯人事務。與引接囚人物件及水管事務。第二課管理監獄內警察。第三課管理會計工犯作役工資建築費。平時費。教務處管教會上事。醫務處管起病及衛生等事。獄內一切事權。歸典獄統制。每年在會議室商議一次。屆時下官有應申告事件。可盡情以陳。典獄有事件。亦可向下官詳細詢問。巢鴨獄每年經費約十八萬圓。囚人工作生產。年可得九萬圓。抵去常年經費之半數。誠良法矣。囚人之資。此監較他處爲多。獄內囚人皆二十歲以上男子。另有一班犯三次罪者。皆重罪也。竊盜犯一二次者不來此獄。平常賭博犯亦不在此獄。此獄皆重罪居多。係既決監也。此巢鴨監獄之大概情形也。門前有製品陳列所五大間。即工犯製成之物。漸偕市川赴淀橋觀水源池。管事員導觀各處。池地甚高。離海面百十七尺。共占地十萬坪。濶過地有十八處。每地十五萬立方

尺水。澄清池二處。每地三百萬立方尺水。凡海水先由多摩川引入到澄清池。由澄清池引入到濾池。濾淨。再至水會總管。然後由總管布入分管。散諸各街市戶人間利用。濾池面有水表一座。濾過之水到表下。從表面上看。即知下有若干水。閱時水正有七十六寸。此水道一到東京市面。四通八達。分管無算。本鄉區最低窪。散去尤易。若欲送高處。則用火龍機運水力。即向高行。東京市夏暑節。每日一晝夜用水四百四十萬立方尺。至冬令則三百三十萬之數。東京用水。年加一年。但此一處澄水。將來不敷民間之用。往往到水難之際。此水泥濘不能汲飲。現議尙再鑿澄清池一個。濾水池三個。濾池每年大掃潔一次。小掃潔二次。濾水池底用小大石子及砂。計四十五寸高。泥匠塗平。石有三層。最下層石子較大。最上層石子較小。最小石子加以砂。石大者圍圍四五寸。中者及半。下者半之半。用此以滌去水之鹽味也。另有濾水池砂石表次觀洗砂廠。皮帶機兩大座。次盛砂場。共四五處砂。先送淨砂廠洗清。再從小管運送入濾水池。次觀機廠。電機大小發動機十餘座。引水入高之處。有小表一座。面有記號。表針時動。針向何方。即知廠內壓水機火力有若干度。看表面中間碼。可知火力。看高處碼。可知時刻。誠奇

器也。閘運水火力大機。時壓力有三十八度。大小機具時迎時送。引入引出。又一室大機十二座。內燒炭。此係發火原動力地也。閘節薪器室。係火爐燒過之炭。其煙熱度到此便作熱水之用。室內盡懸橡皮帶。此係火龍機運水廠也。考日本明治維新小史。東京初乏清水。人苦飲用。後引多摩川水。鑿渠長十二里餘。埋木梘於地底。縱橫流通。每街鑿井。過之。二十二年以木梘易朽。悉換用鐵管。以機械汲引。設漉池數所。去游渣。謀普及。大坂長崎橫濱箱館各處。亦次第修設。凡修設者必由地方公會。稟請內務大臣許可。不許私人設立。其工事水量水質。必要地方長官及市町村委員檢查。有不完全者。則命修改之。此水道之管理也。詢諸市川。東京澄水池。果歸東京市管理云。

二十八日 竟日寒雨。閱法政模範答案集。係文官高等試驗答案及判事檢事登用第一回試驗答案。分憲法。行政法。民法。刑法。商法。民事訴訟法。國際公法。財政學。經濟學各類。足供法政參攷之用。惜譯筆太劣。晚偕吉原友潮赴神田書肆。所睹中國舊本古籍甚多。並有宋版原刻本玉海。明刻子書。及銅版杜詩白詩等集。令人愛不忍釋。

二十九日 九時謁楊欽使。晤。擬看近衛師團各兵營。楊公謂此須函知陸軍省。漸囑

書記具文致外務省轉。蓋外務省有通中語者。專門接待我國派來之游歷官也。訪舒彬儒部郎。鴻儀於九段龍濤館。謁黃仲弢提學。紹箕於新橋厚生館。均未晤。晚赴本鄉書肆購動植物標本圖全套即回。

三十日 閱田次郎日本憲法全書一過。案日本致強立國之由。先則惟五條之誓文。後則惟七十六條之憲法。義務則有制限。而無一人敢以自諉。權利則有保護。而無一人敢以自私。完全之君主立憲。莫日本若矣。我國不欲立憲則已。如思立憲。則取法日本為最相宜。各國行政改革時代。必先預備一目的。而布置。而實行。而求達其目的之所在。然後已。日本明治二十三年。始實行立憲政體。其前十數年作立憲正當之預備。先為宣布。俾臣民趨向已有定所。而一旦實行。固易易耳。若謂文化程度。人民智識。俱無立憲之資格。此固誠然。然必因此而徘徊觀望。進退失據。不為宣告。不早預備。吾恐人民之智識。終無開通之日。文化之程度。終無發達之期。即所謂立憲。亦總無實行之時矣。此實今日我國臣民注集之視線。願當軸者熟籌而審處之。

七月初一日 晨九時偕吉原赴外務省。與書記官坂本商訂考查各項政治之次序。

及日期。以便前赴。晚陽湖留學生湯愛理中來談。湯生昔年在里閉從予受經。於經訓大義。諸家學派。頗能辨析。氣節品行。夙異尋常。其兄鞠隱爲予總角兄。與之同治司農祭酒之學。及漢魏六朝文字者也。君自四年前子身東渡。苦志留學。行將日本大學畢業矣。到東後所見學生。其學殖深厚而足與傾談者。惟君爲最。不但爲吾鄉學界前途之望。而亦爲中國學界前途之望。愛理勉乎哉。

初二日 天氣益熱。午後赴東京病院。視王生痢疾病。經醫生及看護婦診視調治。遽能奏效。甚矣醫學之可以奪命也。中國向來不重醫生。儕於巫祝之列。幾千年來。晦盲閉塞。著醫書者數百家。而臟腑部分各種解剖學。且未明白。遑云治病。華陀略解刀剖法。惜爾時尙未發達。人已以仙人目之。今東西各國研究生理之學。無微不至。議論無憑。實驗有憑。一虛一實之間。中國醫學之不發明可知。微菌傳染等病。東西人檢查尤嚴。必使消毒而後已。中國不知傳染病爲害之深。當時疫流行。一家死四五人矣。六七人矣。皆若以爲不奇。中人向來怕死。絕不知救死之道。此所以微生物日日進步。人類日日退步。近數十年疫症傷生者不知幾千萬人矣。即論日本。當疫症盛行之時。死者

不過數人。此即醫學可恃之明證。醫學進步。微生物自然退步。又一定之理也。各省辦新政。設學校。而不設醫校。不定醫例。吾恐生命界日立於危險之途也。晚溫州余子維網來談。余慈惠學校醫學生徒。曾充北洋軍隊醫官。於醫學一門頗得其道。已學四年。深期其悉心研究。將來為祖國拯救生命焉。(日本維新。派赴西洋學醫者。居多數。故能今日發達也。)

初三日 晨九時偕市川吉原赴小石川區。觀東京市養育院。先至院長室。院長男爵澁澤榮一不在院。書記導觀各處。有事務所。藥局。醫局。醫生研究室。檢查病室。男女健康室。幼童室。幼女室。各項病室。幼稚園。第一二三四學級之尋常小學。及補習科。啞生科室。手工有彈丸。函張。指物。細工。麻履。草履。狀袋。張。裁縫。編物。造花等物。收養分窮民。行旅病者。棄兒。遺兒。迷兒。感化部。臨時窮民。七種。養育院與警察有密切之聯繫。道途上遇有滋事小孩。或無父母而失於教管之小孩。巡查見之。即查問姓名住址。將此孩帶警察署。由署轉送市役所。再送養育院。分別教養。頑劣者送本院所轄之附近感化院。二院分設者。恐頑劣之兒。與良善之兒。合居而同化也。養育院所教多良善。感化院所教皆頑劣者。此院收迷兒遺兒棄兒三種外。凡年老不能事事。又抱病者。旅行客染

病無費住旅人宿舍者。警官見之。準送市役所轉送院收養。或自己赴警察署市役所報告亦可。幼孩之品行性質欠純者。入院後教以生理職業。或幼孩有父母照料。或家有父母有資財而不能感化。思要感化。祇可送民立感化院。其費由所生父母繳院。東京市設之感化院。皆係失怙失恃之幼孩。與此有別。院內養育經費。係東京市擔任。每年有定數。外慈惠之仁人。外國游歷之士來院贊助。亦收入院。小孩既給以衣食住三者。而昔日未經讀書受教者。在此教育。教以營業生計。預備長成自立之資格。有病者來院由醫生診察。或給以藥。給與住所。行旅病者。既愈後可出院。或病不愈。不能強令之出院。如真係無病。應予以健康診斷。必令作工業。倘艱深工業不能。即作簡單者亦許。工資半給本人。半充院內經費。民間無嗣育者。思得幼孩。準赴院內申告。可察視給領。往往院內小孩至富貴顯者之家。時或有之。病院室無數。看護婦。亦係院中養育而成。就之。男健康室暫無居人。因有臭蟲。正在消毒。又一大室有五六十人皆無病者。有浴池、炊室、食堂、背聯在一處。讀書小孩。另有寄宿舍十間。次浣面室。次小孫食堂。甚覺整齊。蓋欲使少小成習慣性也。又一黏四五六七齡孩童。在室內作游戲唱歌。天機

活潑甚矣。次游要場。次幼稚園。小孩皆端坐。見人行過。并知行鞠躬禮。蓋由教育來也。觀製草履室。製信函室。小孩三四十人。運手黏貼。甚形快捷。又有女監學房。有面上生瘡毒小孩專室。計十餘人。登樓觀女裁縫室。大小婦女三十餘人。觀畢回院長室。幼孩所製商品。價甚廉。因購養育院繪葉書。端全套而回。院中贈以報告書兩冊。於室內與王倉稊。齋善龍。伯夔。厩言。鄭巍。生慶。咸相晤。係湖北直隸所派游歷員也。

初四日 晨九時赴深川區萬年町。觀東京消毒所。規模地坪不大。所長導觀消毒機關室。大鐵鍋三座。凡有毒衣服。置方圍木架上。用木輪運送至鐵鍋中。蒸煮。鐵鍋有粗細鐵管。先用細管運動。衣服自濕。繼用大管運動。衣服自乾。不須日光。但用一百度熱氣。計一時許。毒自消去。消毒方法。日本分五種。一藥物消毒。二燒却消毒。三蒸溜消毒。四煮沸消毒。五日光消毒。此係蒸溜消毒法也。觀未消毒品受付室。凡消毒品。不準由大門運入。從左面旁門送入。在此室先檢驗。次洗濯場。消毒後在此場澣濯。清潔。此尋常洗濯法也。次機關室旁之火龍原動機室。此機蒸熱。而鐵鍋鑪粗細鐵管所由運動也。次盛衣室。洗濯後衣服儲存室內。無論何時。均許民人將衣服送所消毒。大概傳染

病衣服尤居多數。所內每年經費由東京市籌用。僅五千圓。而於生命界上保全實爲不少。午後四時警監總會於神田區九段玉川館。開歡迎會。邀予往。此會目的爲研究內政。聯絡中國各省內地警察。彼此交換知識。見聞之機關而設。會長楊君演說聯絡之理由及設總會之始末。會員張君演說中國辦警察以湖北爲始。派警學生考驗又以湖北爲始。將來有無窮希望心。中國警察前途。實惟湖北爲轉移。擔任之責。定賴諸君等語。所言極中時弊。予借諸警學友赴會。爲全體之代表。不能無一言。並誌之。予今日承諸君歡迎。愧不敢當。學殖既淺薄。於警察一端。又未深闡要旨。無足副諸君子之厚期。但僕雖流落俗吏。書生舊嗜。未盡消磨。於東西各國世界之變遷。政法之源流。各書會窺一二。默揣我國法典之多未修改。各省內地之多未開化。人人言立憲。而地方自治之根基未立也。人人言普及教育。而女學蒙學半日學未能廣設也。警察爲地方自治之基礎。爲普及教育之關鍵。對諸國家。有執行法律之責任。對諸人民。有干涉各項之義務。一切內政。在在與之有直接關係。其範圍可云廣矣。國勢積弱。已臻極點。外人覬覦。處處可虞。欲整理海軍。而門戶安在。欲改正條約。而資格尙遙。至於警察則我

之內政。我可自主。外人不能干涉之。自古未有內政不修明。而可禦外患者也。所以中國今日當以實力注意於警察爲第一義。顧中國近年警部立矣。各省多辦理警察并設學堂矣。巡警司將簡放矣。而一時警察之總不得有進步何哉。此其中有一大原因。在東西各國。辦一事。行一政。必擇所學者而問塗焉。通教育學者而後可與言教育。通農工商學者而後可與言農工商。通陸海軍學者而後可與言陸海軍。故必通警察學者而後可與言警察。然後用其所學。而事無弗舉。學必見用。而人皆專研。中國警務之不能發達。固係乎當事者之未諳所學。而亦係乎內外之不能互相聯絡有以致此也。至於留學東邦。肄習警學者。以爲東西各國警察。中國可盡行仿規之。依據之。實亦有不知祖國內地各處之實況與現象者。即論日本警察。始取效法蘭西。後取效德意志。斟酌損益。各就本國人民程度地方情形而爲之。某博士所謂中國警察之不能全法乎日本。猶之日本警察之不能全法乎歐洲也。即以目前論。予所參考之警察。芝署警察與本鄉區已不同。本鄉區警察與麴町區淺草區又不同。一市且然。而謂日本警察盡用於中國。不加抉擇可乎。此留學外國者之不知中國內地性質情形也。今欲組織

一聯合之法。當從何處著手。此事亦未易輕言。諸君設立警監總會警察機關報一事。此得其道矣。但必須報聞各省。不能注意於一省。一面擬就發起之條例。一面編刻警察之樣本。報告各省大吏及各省辦理警務人員。凡古今警察之沿革。各國警察之法制與性質。中國警察之法制與性質。各省警察不同之情狀。各府各縣警察不同之情狀。一一悉載入機關報。內地所不知者。可閱之以增識見。外國留學界所不知者。可閱之以曉內情。將來回國舉辦。自得著手之方。彼此比較。彼此交換。爲改良警察之地步。爲自立內政之先聲。由是而地方自治之制可漸行矣。普及教育之事可干涉矣。二者成立。而中國之立憲庶乎其可矣。諸君此舉。實與中國警察有莫大關繫。當共同贊成。極力擔任。所願早日出報。始終弗懈。則我中國警察前途之福矣。豈但僕區區私願之償而已哉。

初五日 竟日狂飈震怖。寒雨狼藉。晨九時赴新橋停車場送李明池及諸警學生回國。午後監利法政學生吳後安 丙災來談。四時至神田美土代町華人青年會。聆元田作之進君演說青年之責任及美洲之教育。元田君曾畢業美國大學者。

初六日 晨九時赴牛込區早稻田町早稻田大學。晤講師渡俊治君。爲予言此校首創者爲大隈伯。大隈伯嘗謂苟欲國民有獨立之氣象。莫若圖學問之獨立。欲圖學問之獨立。莫若設獨立之學校。小野君梓及高田矢野坪內諸博士。皆贊成。伯投鉅資營築。於明治十五年開校。名東京專門學校。三十五年改稱早稻田大學。以其規模大而法制備也。大學分爲三部一科。曰大學部。曰專門部。曰高等師範部。曰高等豫科。大學部設政治經濟學科法學科文學科商科。專門部設政治經濟科法律科。高等師範部置國語漢文科歷史地理科法制經濟科英語科。高等豫科分政治經濟學法學文學商學四科。別有實業學校及早稻田中學。俱屬大學。學徒共五千人。通國私立學校。莫與京焉。大罇部必豫科一年畢業者始入之。本部之師範科。必本部豫科畢業者始入之。高等豫科。必本科豫科及特別豫科畢業者始入之。本部豫科畢業。其程度與中學校畢業相同。校中圖書館。藏書二十餘萬卷。標以歷史政治法律哲學國學漢文學美術工藝字書目錄小說戲曲諸類。每類少則數百部。多則數千部。另二室皆西文書。縹緗之富。無與比焉。校中有大講堂。兼講學演說。可容二千人。昔之出版部。今改理化

科室尚在修理。此校有專設之中國留學生部。渡俊君即中國留學生部主事補也。

初七日 晨九時赴上野觀東京美術協會。係第二十一會彫刻競技會。每當開會時期。無論紳商士民。所有美術彫刻器物。悉可陳入。皇帝宮內省物亦來陳列於中。銅製之介族獸族。象牙彫刻之猿。鐵製之魚蟹馬牛。石膏製之人物。銀製之各項美術。彫手之。精工工鬼斧。桑木製之戰捷紀念圍屏。陶製之五重浮屠。價值數千金。銅製之男爵末招家像。即伊藤侯之婿也。各物皆列彫刻人姓名。另有各國陶器。存儲比較。蓋非賣品焉。東京彫刻會。每年有彫刻競技統計一覽表。以備考查。美術工藝之發達。大率由此。

初八日 晨九時赴外務省接待員岩村成允爲訂參觀之法。據云各省游歷員有七八十人之多。海陸軍學校近衛師團。必由外務大臣亟知陸海軍省大臣。往返訂定。須有十日。帝國大學。詳細參攷。必一禮拜。農科應參攷一日。工科理科均同。但觀屋宇實在無益等語。岩君所言。先得我心。蓋與其務廣馳多。而但事表面。不若詳細少觀。而較有實在也。岩君又云。貴國游歷人員。有並不實地考究。所到之處。僅索得章程一冊而

回國者。官階愈高。愈不肯虛心訪問。岩君肯言。足徵坦直。在予聞之。益覺滋漸。午赴三田町觀慶應義塾。此塾大教育家福澤諭吉所創。福君不仕。留心教育。日本數十年來教育之發達。皆福君之能力擴張之。校爲私立之最完全者。分大學高等中學高等小學幼稚園等部。內並附商工學校。此校建築法較他校尤勝。各部房室。分之則如獨立。合之則皆一氣。校中學生四千人。寄宿舍常有二千人。予所觀早稻田大學。並此校學生已及萬人之數。東京一府大小學校。其人數奚啻倍蓰。人人皆學。通國皆然。尙慮有失業游民乎。吾國一省學堂。恐尙不及萬人之數。教育普及。所以難矣。校中幼稚園學年室。內望板以福澤諭吉著述版片爲之。蓋紀念物也。幼稚園自修室懸福君寫真大片。大學食堂懸福君所書獨立自尊四大字匾。(筆意類松雪)蓋欲學生皆尙自治也。吉原云。在日本論。凡中校畢業。當定意見。如願入帝國大學。應先進高等學校作預科。入慶應早稻田兩校。則不入高等豫科。可酌量入大學。畢業後均給學士。

初九日 晨九時赴神田區御茶水東京高等師範學校附屬東京博物教育館。觀第一陳列場。家庭幼稚園。小學校教育用具及成績品屬之。目列於左。

(鈔記品目。近於寫帳。然偶閱一過。

亦足觀發精
神。故錄入。

幼穉園用手本

植物礦物標本

英國製實業示教圖(如製紙場鐵工場燭屋
郵便消防唧筒之類)

翫具

帝國歷史圖(即歷代
君臣像)

算術用具

度量衡標本

圖畫模形

實業示教礦物標本

英國女學校寫真片

體操檢査用具(如肺量
器銚等)

裁縫品

江戸游記

幼穉園恩物

動物標本

褒賞品

教場用具

庶物標本

圖畫用具

體操及遊戲用具

圖畫模形及臨本

地理教授用具(各國圖入
種模形)

地學名稱示教模形(英國
製)

軍艦模形

女子高等師範附幼稚園用具及成績物

小學校理科用人生理模形及掛圖

模範小兒室

幻燈

過此入杏壇門。即先師孔聖廟也。德川時代名昌平齋。當時日本第一學校也。（其時中已設學校。與中國有名無實之泮宮性質已不同。中國今日各省府縣無地建設學校。可不以孔廟爲之。古時孔廟中本有學校。學宮即校舍。士子入學即進學堂。明倫堂即講堂。尊經閣即藏書樓。學官即教習。門斗即齋夫。孔廟真和本若此。）進入德門。觀第二陳列場。係物理、數學、地學、星學、化學、動物、生理、植物、教授用具屬之。程度較高。目列於左。

動物標本

礦物學教授用品

化石圖

石火山噴火口圖

結晶模形

歷史教授用標本（太古遺物不少）

星學用器械（如日界模形地徑星辰運行械之類）

佛國製佛國高低地圖

星學及地學教授用具

化學器械及藥品

物理學器械（如雨量計、自記晴雨計、獨國製濕度計、日照計、獨國氣溫濕度計、獨國毛髮濕度計、獨國地理檢閱器、獨國水中檢溫器、獨國水銀晴雨計之類。）

幾何學用模形

音響之部

靜水動水及氣體之部

重力之部

力學之部(以上皆物理學器械)

次觀第三陳列場。係實業教育用具及成績品。與圖畫音樂體操教授用具屬之。目列於左。

美國製風琴

織物模形下繪

著色石板畫見本

米國製畫學用桌子

佛國製圖畫臨本

農具雛形及農用動物標本

佛國巴里府公立男兒小學核手工科生徒鐵工製作品

圖畫用模形及臨本類

澳國製木工切組指物挽物彫刻樣本

瑞典師範學校木工教授用標本

諸工業學校生徒製作品

東京工業學校附屬織工徒弟學校金工科生徒製作品

廣島縣職工學校生徒製作品

東京美術學校生徒木材彫刻品

染織標本

工藝品製作順序標本

米國製活字印刷具

透挽器械

絨毛見本

各學校生徒椅子桌子式形

進大成殿。恭謁。先聖像及顏曾思孟像。平時。聖像在龕不開。有行謁。聖禮者。始將簾捲起。啓龕門。禮畢仍扁如初。日本之敬。孔聖如此。予欲進殿伊始。本有人不許。云普通人不能上殿。答以故。乃許入。日本政俗擷要云。德川時代(距今二百年)。尊崇孔子益篤。仿中國式。建大成殿。塑聖像。四配像。門不輕啓。現惟高等師範生卒業時。集齊大成殿。請出聖像。分班行至敬禮。領文憑。予謂孔子有知。必忻然曰。吾道東行矣。殿上所陳各品。目列於左。

獨逸國畫教員養成所練習學校生徒成績品

佛國諸學校生徒成績品

語言書類

外國教科書

現行教科書(教科書分過去現在二種)

英國諸學校生徒成績品

米國中學校生徒成績品

獨國師範學校成績品

水彩畫見本

英國諸學校成績品

米國諸學校成績品

中國喀喇沁王府毓正女學校第一期學生裁縫成績品

東京渡邊裁縫女學校成績品

暹羅國學校生徒成績品

熊本尙綱高等女學校生徒成績品(皆裁縫織繡之類)

和蘭國職工學校生徒切機細工並鐵工製作品

和蘭職工學校生徒旋盤彫刻並石膏製作品

此館教育用具。大小完備。宜其文化普及。國有進步。日本誠今日東方之學國也。

初十日 晨九時赴金杉芝浦株式會社製作所。於第六應接室晤商務部長巖六平君。爲言此所專造電信機械。資本百萬金圓。每年有十分之一之利息。中國用此所機械者少。惟天津日本租界。電信機器用此。公司中三井股分居最多數。現此所注意於水力電機火龍電機。中國黃河長江。水甚浩淼。惟水力電機可使之高下運動。燒煤炭嫌熟。故用火龍電汽。水火二種電機。均在茲廠製造。廠內不用西人。皆學成之本國機

工。日本惟紡紗廠尙用西人。此外均不用。近紡紗廠亦不用西人矣。製造艱難。昔時多用西洋機械。日本內地購用本所者尙不多。無論一二電俱。價值貴昂異常。必到四五年後。全國一律用水火電機。乃可望發達。今尙在困難時代也。大凡工業上事。不能爭目前尺寸之利益。必計算國家公共後來之利益。十年後。二十年後。見成效。泰西大工廠往往若是。當存公共久遠之主義。不可存一人私利淺近之主義。明治二十六年三井合股辦機械公司。東京工廠尙有數處。而皆不若此廠規模之寬拓也。外如三菱等造船公司。兼及造水火機械。至製專門水火電汽機械。日本惟此一廠。所內辦事。分販賣出納倉庫三項。此製造所之大概情形也。巖君導觀木工規樣室。凡造機械先製木模形。在此室結構。次觀三十噸重之電汽起重機。次機械室。電線圖及各種機料。積儲甚多。次電汽機械製線場。次製械廠。木模形樣構成。送此照製。廠內鐵模形甚多。次鍛修廠。凡製就機械。交此磋磨。次切深厚鐵機室。機上坐兩人。旁有皮帶原動力機。汽甚猛烈。一面機械運行。深厚之鐵。片片切下。昔時蓋用人功也。次切鐵條機械廠。昔時亦用人功。今皆改用機械。次製火龍機械廠。次發電機械場。(一名試驗場)內製發電汽之機。此處

製就。運送他處。如電燈電線之類。由此發出電汽也。次修理鍊鐵廠。電機成就廠。此處借發電廠力運動機器也。次製發動機械室。次製大機械廠。次送電機械廠。此製作所工場情形也。觀畢。巖六平君贈芝浦製作所營業要目二冊而去。午後偕吉原赴京橋區沖商會。晤會長沖牙太郎。桌上設一電氣扇。用繩引電。入銅罐內。有陰陽正負兩電。相擊而風從上出。亦有用乾電放扇底。不用繩子。(予昔於上海天津等處常見之)然風不甚大。至扇之總筒。盛陰陽電則一也。沖會管事陪行觀第一製造廠。(距泖商會中國二里許)此廠專製電線機電話器電鈴電扇等具。各室分十餘門。此外雖有此等製造機械所。結構皆小。規模稱完全者惟茲一廠。皆沖君一人之資本財產也。明治三十年後勦設。其始日本所用電械。來自歐洲。遞信省以爲虧耗已甚。遞信省遂建一電信機械所。沖君時在省署。聞有此舉。乃另行發起組織此廠。逆料後來必能發達也。現遞信省原設舊廠亦無存矣。明治二十八年東京始有電話。西國來貨甚多。自本國設立機械後。已能抵止。現東京用電話機械者計十萬之數。其中二萬係西洋物。八萬皆自製物。自製物尤以沖商會工場爲最多。上野第二次開博覽會時。電機甚不發達。至前年大坂開博覽會。沖商會

得名譽銀牌。去年入美國聖路易博覽會。亦得獎品。明年上野開第六次博覽會。故現時工廠正在預備賽會各項。機工日不暇給焉。宮內省陸海軍省遞信省各府縣。俱用此廠機械。販賣於外國者。惟滿洲高麗等地方而已。今井俊太郎君又謂本會尙有二大工廠。一製造大機械。一製造線。並此共三廠。機匠四百人。明春無線電報機可以發明矣。沖牙太郎以一商人而興工業。獲資財教百萬。賞男爵。不知者議國家之獎加富人。似非計之得者。殊不知提倡工業。開通利器。抵止輸入。教養貧民。其功爲莫大。國家焉得而不從重獎勵之。以爲興工業利民用者勸。觀於此而不能不爲我國商人慨矣。十一日 晨九時赴新橋鐵道作業局溜車部。晤部長畑精吉郎。爲言鐵道爲國家至重要之事。內應設各專門部。當開鐵道之始。作業局下有建築部。專造鐵道線路。線路告成。建築部將線路交工務部。工務部專管鐵路事務。故又得名(保存)鐵路。路工竣。可開車。乃設溜車部。既有火車。必有搭客及貨物。然後設運輸部。運輸部在火車場管理車價。一切費用交運輸部。此部不但管理坐客物件車價。凡火車場用物。由外購入者統歸經理。至鐵道收支出納事統歸會計部。此辦理鐵道應設之各部也。管理各

部事。係作業局長官。作業局下有五部。五部下又分各項。譬如瀛車部。其下第一課係運轉。第二課係工場之類。作業局有出張所。在遠地。所內有小長官。出張所一帶鐵道歸其管理。仍受制於作業局。管理鐵道有法律命令。然有時亦可從權。以火車取快捷。不能事事待法律命令而行。所以日本鐵道仍用慣習法爲多。局內所用管理人。皆有專門學問。大概卒業帝國大學本科者。彼未曾在專門學校者。恐用之仍無濟也。畑精君又謂鐵道統歸國家收回。爲國家之產業。日本全國鐵道有五千英里。高麗尙不在內。現五千英里內。官民股分俱合。然公司辦理。甚不盡一。行車裝載。費多參差。開車遲速。亦無定限。甚非交通便利之道。於是政府統購公司原股票。給價收回。以歸合一。民間當初不甚願。明治三十六七八年。以平均利益二十倍攤分與民。此國家賠與民間也。作公債給與民。按年作五分息公債。還給民人。國家若此吃虧。比資本更多。所以民間無怨而樂從之也。以上有利息之鐵道。亦有無利息之鐵道。政府與公司會商協議。以定購回之價值。其價應在資本以下。不能在資本以上也。

歐洲各國鐵道之沿革

(一)鐵道創業時代(辦理歧轍。不能盡一。)

(二)鐵道統一時代

(此時各公司已能作合一之計。英美法德。皆用合一辦法。以日本論。今年甫至統一時代。)

(三)鐵道整理時代

鐵道爲流通全國血脈筋絡之物。商工業之衰旺。視此爲機關。如民人合股。或辦法歧異。於交通上甚形妨礙。國家不惜鉅資。過原有之資本。分給公司。以爲政府統一之辦法。集機關於中央。固歐洲各國之通例也。各國凡商業界事。人民羶之。國家如思收回之。無不倍其利息給之。正以求其交通之利便。工商之發達也。我國收回輪船電報之法。則異是。烟精君派鐵道技師工學士森彥三。導觀修理汽罐車工場。客車貨車新製及修理工場。旋盤工場。鑄冶工場。(廠內有大宙生鐵。森君云。大冶鐵質甚佳。與泰西同。)仕上(做好)工場。銅工場。鑄物工場。(日本機關車自造者尚不及十分之一。大半來自西國。此外各項車及零件均自製。)電氣工場。裁縫工場。塗工場。發電所。門司有大製造機關鐵工廠。內製鋼軌。日本鐵道所用鋼軌。半係自製。半購外國。機關車目前雖有外購。不二三年後。吾知其必能自行製造矣。偕吉原於新橋料理館午餐後。赴東京郵便局。晤局長。爲言現值伏假。局內下午無人。惟郵便爲交通上事。不能停息。

故有下官在局。代上官辦事。局務以郵便電信爲主。郵便課電話課爲通國機關。外尚
〔有外國郵便課。此爲第三課。第四爲替貯金課。〕（管理滙兌銀物。民）第五爲厩舍課。（東市地
所以厩舍養馬甚多。並蓄獸醫馬夫。）第六爲鐵道郵便課。在火車上亦可送信。有管理火車
郵便人。警加由新橋至橫濱。執事人即將郵箱檢出發送。以上皆交通機關。第七電話
科。亦交通事。有電話交換所。用女子司理。以其音輕細而清亮。故用之也。電信雷話之
外有電車電線。此爲第八課。係專門管理電線電車事。爲工務課。監理課。日本郵便局
可分三項。最高爲一等郵便局。次爲二等。次爲三等。東京郵便局爲一等局。一等者可
管轄二三等局。東京府下所有二三等郵便局。統歸此節制。大概每縣有二等郵便局
一。每町村有三等郵便局一。以上監理課一項。即管理東京府外千葉埼玉山形等縣
之郵便局務也。會計課管理銀第出入及購置用物。庶務課管理局中人進退賞罰各
事。尚有軍事郵便課。日俄開戰時增許。現並無事故。此東京郵便局大概規則也。局長
導觀郵便電信二課。電信機械室內分七部。內第六部美國往來通訊電機。與尋常不
同。以有太平洋海底電纜故。今年八月初設。現可與海底線直接。另有間信總機。定時

機。傳天文臺信以告各處鐘點準刻也。第七部電信課機械室。局長云。此處電信稍簡。本年二月新招募。用女人辦理。甚爲得法。此後各處均將用女人也。一部長云。現時舊式樣磁具電機皆不用。已改良新法矣。閱郵便課。管理信件及小包。各有專門。收發壓印處。四分時印千張。神速無比。改印後分地方共三大分區。無數小分區。東京市各府縣用大分。市町村用小分。次通常郵便專門掛號室。(掛號在口)每日計郵便物八十萬件。費每日一萬五千圓。觀送郵便信使令室。搖鈴排班。站立點名。演試攜袋舉手各禮。一以軍隊教育部勒之。蓋人數叢雜。難於管束。以軍隊主義行之。自整齊畫一矣。

十二日 晨九時赴本鄉區帝國大學。講師導觀醫科部。醫科標本室。實驗室。顯微鏡實習室。解剖實習室。皆眞模形。用藥水浸缸罐內。動物標本室。有獨國人全體形及日本古時人體彫刻周身花文之皮。醫科附設病院。預備學生實驗。次觀數學物理學化學教室。教習試驗空氣自來火管。抽空氣機。辨音器。晴雨表。測量尺機。光學室試驗偏光器。回光鏡。物理學小光學室試驗顯觀鏡各器。次觀理科圖書館。及人類學教室。工科教習寺野精一君。爲言陸軍大臣寺內正毅咨問文部省視學官野尻精一調查大

學學生實數。日本法律。凡在學校者暫不當兵。（卒業後仍有當兵義務年限）因之恆有託名在校。冒免兵役者。故陸軍省調查之。農科須實驗不在校內。寺野君並訂陪赴續觀。盡一日之功云云。午後談御茶水之印刷工場。晚吉原談五年前金港堂書店賄賂一獄。當時該堂管理賄贈各府縣知事各校教師。凡出版圖書。以一手包攬。大有龍斷之勢。後被發覺。府縣知事及各校教師數十人。由司法省發裁判所審問。裁判官今村訊得實。府縣知事及教習。或褫職。或監察。俱處以應得相當之罪名。博文館書社。行端不苟。政府出版各書籍事皆屬之矣。又上年九月初。東京士民因日俄和約。有損國家權利。政府未預期將約文宣告。有違立憲國行爲。致起民人對政府衝突一事。先是民人之急進黨。議在日比谷公園開議事會。內務省大臣囑警視廳嚴禁。屆時各警署巡查。用鐵杆作圍。嚴密防衛日比谷。不許民人入內開會。以至巡查用兵刃殺傷多名。由是人民大動公憤。東京市內警察派出所。一時焚燬殆盡。又焚毀電車數十乘。政府下戒嚴令。（文明國內下戒嚴令。歐西各國所無。故日本臣民深以此舉爲譁。而不對人言者。）拿獲民人二百餘人。交裁判所暫羈。全國憲政黨大譁。河野杉田於裁判所

憑公理宣斷。謂此次民人會議。各存愛國思想。內閣行爲。不能無議。迅將二百餘人釋放。以符立國憲之性質。免爲地球各國譏笑。否則當將國民議會解散云云。一時觀審民人數千萬。拍掌聲如雷。卒違河野君議。而人民乃帖服。內閣大臣亦於是罷職矣。由是以觀。日本人民之舉動。能守定憲法範圍。具國家之思想。而爭民人之權利義務。乃發而爲此文明之衝突。河野君一言重於九鼎。而政府卒從其計議。蓋深知憲法之貴乎國家及人民互相維繫者也。設或不然。吾不知日本之現象將若何矣。

十三日 晨九時赴麴町區勸業銀行。晤理事五十嵐敬止。君爲同文會會員。於中國人士來東。最肯熱心指告。與長岡護茂同守東亞同文主義者也。長岡逝後。如五十嵐君其人不多得。君爲言銀行之名曰勸業者。以求發達工商農實業爲主。國家要發達實業。故命設此銀行。股本一千萬圓。如民人與農工實業。需借款項。以不動產抵與銀行。然後由銀行派鑑定人至該地察視。民人不動產是否可靠。所興實業是否將來可成。再議借款。給以債券。股本一千萬圓。一股二百圓。共五萬股。可發三千二百五十萬圓債券。銀行內總裁理事各官。一人均有自出股。係政府命定之。銀行對民間債券利

息五株。即五分。民人借銀行款周年六七分息。此百萬債券。於四十年內當還訖付清。債券內有彩票。一年開兩次。將債券中利息。或千圓。或五百圓。用器搖彩。其法用圓機輪具一。內盛石子。譬如有五千人。即川五千粒石子。得者或五百圓一千圓。分三等。此月利息即不付。民人以有彩票希望。甚樂從。除付息一月作彩票外。息金仍照常給。勸業債券。每張三千圓。儲蓄債券。每張五圓。債券可比一千萬圓加二十倍發。儲蓄債券二十年還訖。一年三分利息。計一角五分十九張息。按年還訖。至二十年期不開彩票。此項儲蓄勸業債券。各處銀行均代理。中外遠近。皆可購買。在日本銀行有九種。發彩票者惟此一處。其主義專發債券。民間不能儲蓄。要儲蓄當購債券。此與各銀行性質不同也。君又謂辦事須專門。譬如我辦銀行。即不能辦學校。方專注有益。貴國派人調查。最好各認一門。較能詳細有實用云云。並謂銀行一門。事務甚形複雜。必曲折指告。乃達原委。約午後再譚。漸偕吉原至日比谷松本樓午餐。二時赴鞠町鐵瓶町東京郵便電話課。觀覽電話交換所。其交換機有電汽小筒發光。即看上面號碼。中國尙無此小筒電光機。終日坐視。有損目力。局內管理電話。有三千餘機。分二種。一名複式交

換機。一名單式交換機。女子每日勤務八時。分早晚班輪替。八時間亦分開。勤務一時。可息十五分。交換手女子共二百數十人。各郵便電話處。統計用女子有八百數十人。(此單指東京市內言之。女子初進日得金一角五分。最多可至日得五角。招募時有定章。皆高等小學堂二年畢業生。年以十三歲以上二十三歲以下爲度。管理交換手者名伍長。另有交換手取締法。管理風俗衛生兩項。此類女子不必定明電話事。品行端正。即可充之。東京市民間設電話機。先報告郵便局。每年費六十六圓。管理某君云。電話不拘遠近俱可通。以過遠則經費需多。故不能通行。四時至神田訪五十嵐君晤。君手攜借樂園聯句一幅。與予觀。內有胡綏之玉璠羅荇農慶昌聯句。君再爲言勸業銀行出入詳則。銀行各官。均有股分。大抵總裁副總裁有百餘股以上。理事有五十股以上。檢查役有三十股以上。總裁副總裁理事。五年一換。充理事之員先六月挑選。必先出一百或五十股以上股分。不能臨時入選。一年兩次開股東總會。議銀行盈絀。售出債券幾許。收入債券幾許。屆時各股東均集。在行辦事人。將給發各股利息事。與各股東商議。其規則與開國會議事堂彷彿。銀行中有臨時債還。譬如某以不動產千

萬圓抵當借款。銀行即應給與千萬圓債券。一時銀行憑據實款。俱貸與民間。當一一收轉應付抵當不動產之人。此時銀行難免虧損處。有買入償款。係銀行中人購買債券。其性質與中國之籤捐彩票局中人自購票同。查日本明治三十二年大藏省頒行普通銀行規則十六條。凡民間開設銀行。須受大藏省監督。經費不足。則政府貼補助金。無非思流通機關。興旺商業。此不能聽民自設。或有倒虧等事。以致破壞全局也。至發行紙幣之特權。惟國家操之。他銀行不能擅發。據法學博士田口卯吉氏所言。現在紙幣流通之數。一億八千四百萬圓。其八千四百萬圓。有現存金作抵。謂之正貨準備。其餘一倍圓無現存金。則必有公債證書爲抵。謂之保證準備。以年利六厘計之。即一年生利六百萬圓。是以實金八千四百萬圓。充當一億九千萬圓之用。蓋全以信實行用也。民間信其確定。且樂用紙幣之便。常有持金銀塊售與銀行。以易紙幣者。日本紙幣近年流行外國。中國與朝鮮通行已數千萬。近又挾制朝鮮全國通行日本紙幣。至勸業銀行之法。尤可利國家。廣實業。我國可以仿行。是在當軸者。

十四日 閱萬朝日報。有載北京學部訓令各省督撫。以後派日本專門學校之留學

生。不論官費自費。必學力優衆。曾卒業中等學堂。又精通口語者。以外不得濫派等語。此法最善。現我國學生來東。如川之赴壑。至有國文未通。教師舉中國歷史相問。茫不能答。年幼學淺。充其極必與昔曾文正公遣派十四五齡之留美學生百餘人結果相等。與以限止。則此弊免矣。日本警察與森林之關繫。範圍甚狹。森林屬農桑務省。另有官衙。分大林區署。小林區署。保護區官舍三等。大林區署長名林官務。(高等官)小林區署長名森林主事。(判任官)保護區受持名森林監守。大林區署五六。小林區署保護區官舍不可勝數。大林區署下有十或二十之小林區署。小林區署下有五六或七八之保護區官舍。而背屬於農桑務省管轄。

森林官衙與警察官衙同等之比較

森林官衙——大林區署——小林區署——保護區官舍
警察官衙——府縣警察本部——警察署——巡查駐在所

凡有盜賊伐森林。或民人放火縱燒森林之時。警察官見得干涉而捕縛之。森林官衙所管理。係御料林又官林。至民人森林。仍由民人經理。但民人或有伐木改耕煙地。或

放火燒山林原野等事。必報告警察署。故警察署有管掌森林警察之員。

十五日 九時赴淺草區淺草橋高等工業學校。校內管理導觀一年生圖畫室中之建築裝飾圖案窯業圖案織染圖案。圖細精妙無比。(以上工業圖畫科教室)次應用化學科教室。準備室。定性分析室。定量分析室。電氣化學分科。應用化學科。電氣化學實業室。發電室。顯微鏡室。釀造製糖實驗室。(世界各國一年所產糖數百六十七億五千萬斤。日本產一億六千五百萬斤。日本國內年用五億三千五百萬斤。輸入三億七千萬斤)工業圖案科。製版工場。內畫印片最多。三色版印刷順序尤精。漆工實修室。內蠟色圖順序標本。各種金屬粉類標本。各種蒔繪順序標本。梨子地塗順序標本。生徒實修製作品。生漆製漆色漆標本。彩髹標本。高蒔繪順序標本。皆精緻可觀。日本漆器向完善。今研究益精。稱爲地球各國之冠焉。次整理工場。內如白國製刷毛機。剪毛機。獨國製霧吹機。英國製糊付機。白國製起毛機。獨國製縮絨機。白國製洗絨機。獨國製絹布力織機。英國製木綿力織機。米國製木綿力織機之類。(各種機具不勝備舉)各項綢布。日出數千疋。次窯業原料標本室。窯業總數。全國年輸出五百二十二

萬圓。輸入二百零五萬圓。其抵止力可謂宏矣。次機械科工場。凡機關室鍛工水力試驗鑄工皆屬之。次建築科製圖室。外附屬職工徒弟學校。工業補習學校。一面實驗。學校工廠。合而爲一。日本自明治九年來。行美術獎勵之法。專精講求。無微不至。工藝神巧。稱爲東方美術國。近二十年間。出口貨日益加增。織物業最盛。織工一百餘萬人。陶器漆器。尤國人之特技。各府縣地方開勸工場。以鼓勵百工。越數年必舉行博覽會。陳列製造物品。較其優劣。互相師法。是以製品日精。月異而歲不同。論者每謂日本貧國。而教育如是完備。工商業如是發達。吾不知其所謂貧者。果何所見而云然也。

十六日 閱日報。悉我國政府已宣布立憲之諭。日本各報紙日日著議。大隈伯中國睡醒談一篇。尤中窳要。

十六日 赴憲兵司令部。晤憲兵副官。憲兵者屬陸軍大臣管轄。掌軍事警察及行政警察司法警察。軍事警察者。承陸軍海軍大臣之指揮。有時行政司法兩警察之事件。承警視總監及廳長官府縣知事之指示。關於其職務上有正當之職權者。有要求時可直應之。然非受暴行時。非爲占乎土地及委託之場所。或爲防衛人。不得用兵。

器。東京置憲兵司令部。各憲兵隊管區。配置一憲兵隊。各憲兵隊本部。置之於師團司令部所在地。各憲兵隊配置及管區。陸軍大臣定之。憲兵司令部設憲兵司令官。次憲兵副官。次憲兵下士。憲兵隊設憲兵隊長。次憲兵隊副官。設憲兵分隊長。次憲兵隊附士官。次憲兵準士官。次下士上等官。憲兵司令官統轄各憲兵隊。總理司令部事務。並檢閱憲兵隊之軍紀、風紀、訓練、教育及職務服行之程度。憲兵隊統轄各分隊。指定其勤務方法。總理隊中事務。憲兵副官受司令官之命。憲兵隊副官受憲兵隊長之命。憲兵分隊長指揮監督部下指定之勤務方法。憲兵隊附士官。承隊長之命而服勤務。此明治三十一年所定憲兵之條例也。午後重游八景園。

十七日 寒雨。赴小石川區竹早町觀東京府女子師範學校。此校以養成女子小學教員爲目的。修業年限三年。分爲公費生私費生兩種。年齡以十五歲以上二十歲以下爲度。但有特別事情。雖二十年以上之人亦許入學。試驗時必國語能通普通文之講話作文習字。算術能通整數分數小數之加減乘除。并比例者入之。其學科有修身教育國語漢文歷史地理數學理科家政習字圖畫音樂體操。校長導觀各處。規則

甚形整齊。其女子行檢端肅。皆養成教員之資格者。午後四時偕岩成訪法學士小森澤祝三長談憲法事務。小森君言倣國立憲。甚非易易。其國家堅定而不搖惑者。以即位時有定國是之五誓告文。及十四年定開國會之預詔。中間雖經變端。上下互有衝突。而風潮益起。而進步益速。經營締造。垂二十年。而得達於立憲之境。此皆由開明之君振起於上。政黨之臣輔助於下。不至蹈法蘭西激烈之覆轍。可云幸矣。今聞貴國立憲。有採用倣國制度之說。敢將立憲之先後階級時代所歷事項約陳云云。小森所述。頗形紛襍。畧整齊之。以識於左。

(一) 立憲發起時代。明治七年六月令地方官至東京開地方官會議。八年一月約木戶、板垣、大久保、伊藤等。會商於大坂。密定將來施政方法。世謂之大坂會議。二月。有詔命木戶等調取政體。二十八日案成上之。立憲政體。實基於此。八年敕置元老院。以廣立法之源。置大審院。以鞏司法之權。又召集地方官以通民情。圖公益。蓋自有此敕。而立法司法行政。三權漸得分立矣。六月。開地方官會議。日皇親臨。許士民傍聽。七月。議定全國民會公選法。其時新報風行。演說大起。民人知識。

日見開通。九年，置憲法取調局，於元老院。勅有栖川親王採海外各國成法，斟酌裁定。是月即改府縣裁判所，置地方裁判所。十年，再開地方官會議，定府縣規則，地方稅則及郡市町村區編制法三事。七月發布，地方權力始漸擴張。十二年，設立府縣會，專講求地方自治制度，會員由民間推選，即現行制之基礎矣。

(二) 立憲議論時代。十二年，愛國社成立，是社即今日政黨。要求政府設立議會。時注國盧梭民約學說初入日本，影響甚大。地方紳民結黨立會，論時政者所在蜂起。人民皆有爭權利之思想矣。十三年，愛國社使河野廣中、片岡健吉二人代表二府二十二縣八萬七千餘人，赴大政官遞書，題曰國會開設願望書。大政官拒弗納。社中人益欲達其希望，勢愈激烈。未幾愛國社改爲自由黨，即板垣諸人組織而成也。

(三) 立憲豫備時代。十三年，政府以自由民權之說寢熾，頒布各種法律，制限人民。而國民之政治思想，更益精果，不可遏禦。政府內稍有文明思想者，察人心之趨向，一時主張立國會者不乏其人。十四年，日皇巡狩東北，各地方報館新聞，無不

力詆不設國會之弊。政府始悟其剛愎自用之非。日皇採訪輿論。知民情之不可拂。即日開御前會議。撤銷前令。遂於十月下詔。定以二十三年開設國會。行代議政體。而衆論始定。自此詔頒發後。人民以須豫備。政黨相繼興起。福地源一郎。丸山作樂。發起立憲帝政黨。大隈伯發起改進黨。今爲政黨本黨。自此議論稍息。羣相趨於豫備自立地步矣。

(四)立憲確成時代。十五年命伊藤氏赴歐洲調查各國憲法制度。尤注意於德意志。十七年設制度取調局。十八年改爲現行之內閣官制。第一次首相即伊藤氏也。伊藤舉政綱五條。布告國民。一明官守。二立選叙之法。三省繁文。四節冗費。五嚴規律。舉國稱善。至今堅守之。二十年九月。召集地方長官。下憲法發布行政振肅條約改正三件之訓令。二十一年設立樞密院。

(五)立憲實行時代。二十三年二月。頒發憲法七章。天皇十七條。臣民之權利義務三十二條。帝國議會五十四條。國務大臣及樞密顧問五十六條。司法裁判所六十一條。會計檢查院七十二條。又制定皇室典範。(係皇室人應守之規則。於是

人民對於國家之參政權乃定矣。

十八日 晨市川電話告知行期。午後赴青山補觀大學農科。

十九日 東京民人因電車加價。連日爭擾。至有以石子擊車中坐客者。警視總監安樂日日傳齊各署會議取締辦法。九時赴新橋送市川警視赴鄂。

二十日 借岩成赴麴町區永田町觀華族女學校。校長導觀各講室。此校皆係上流女子授高等教育。其學科有小學科中學科二等。二等中又有初等高等二級。年齡六歲以上十八歲以下華族子女。皆得入學。士民子女亦有許入學之特例。其修業年限。小學科初等三年。高等三年。科目有修身、國文、漢文、歐語、地理、歷史、算術、實物、理科、家政、習字、圖畫、裁縫、音樂、體操各科。觀體操一時許。即回寓。

二十一日 八時赴木所林町二丁目觀東京職工學校。此校以從事金工木工者授必須知識。而養成善良職工爲宗旨。與高等工藝學校之從弟學校半日學校相等。木工分大工、伙儻工、木型、金工、分鑄造、鍛冶、仕上。入學年齡以十二歲以上十六歲以下爲度。學力須卒修業年限四年之尋常小學之課程。校中規模簡單。而精神發達。中國

此等校。武昌已有開設。各省尙未聞也。

二十二日 九時至赤坂區葵町觀大倉商業學校。校長小林貞吉爲言此校係豪商大倉喜八郎所創立。明治三十三年開校。爲欲從事內外商業者。授實地應用之教育。學科有修身、圖畫、作文、習字、數學、地理、歷史、外國語、經濟法規、簿記、商品、商事要項、商業實踐、體操。修業年限預科二年。本科四年。農工商爲立國之本。中國商校。各省俱無。似宜籌及。晚陽洲同鄉孟莚生昆季來談。二君國學最優。留學法政。其見地與尋常不同。

二十三日 偕岩成至小石川區觀礮兵工廠。晤管理金子俊治。君云。明治初年。有結神風黨於熊本者。自誇武勇。唱攘夷之說。旣而外人攻其南方土人。屢戰屢敗。究其故。加軍械利鈍懸殊。於是研究泰西兵械者踵起。數年而有礮兵工廠之設。立國全恃乎兵力。兵力之強亦恃乎兵械之利。譬如與鄰國開戰。兵械不能購諸外人。必國內能自製造。方便接濟。否則自危之道云云。導觀電管場。鐵工場。造槍處。鉛丸場。製銃所。大小共數百棟。器械可稱完備。工人有三千之數。金君又云。敝國自設此廠後。一切戰鬪器

械。皆本國自造。不須外購矣。廠地舊爲幕府親藩水戶侯邸。境域甚廣。觀後樂園。在廠內。即水戶侯之舊園。爲諸藩邸園中之冠。園中作瀑布灌大池。其景致令人有在深山幽谷中之想矣。

二十四日 仍寒雨。九時赴豐多摩郡澁谷村觀女子工藝學校。此校授女子須要工藝。並教修身齊家之大要。分學科爲本科。專科。豫科。補習科四種。修業年限。本科三年。專科二年。豫科一年。高等小學二年級修畢者。及學力相均者。皆得入學。本科各年學科課程。有修身、國語、算術、理科、地理、歷史、家事、習字術科。各年課程。有裁縫、編物、刺繡、造花、插花、圖畫、押繪、速記、割烹。皆有實驗。以便練習。故實業學校。必備資料。創設甚非易也。午後赴芝公園觀日本女子美術學校。此校以授女子高等學術技藝專門技術及養成教員爲目的。學科有英文科、國語科、家政科、日本繪畫科、西洋繪畫科、音樂科、彫刻科、刺繡科、裁縫科、造花科、編物科、時繪科。又分文學、美術、藝術工藝三部。別置研究科。高等女學校卒業者得入高等科。高等小學卒業者得入普通科。校員導觀各室畢。云、東京市勸工場所列各種美術商品。本校生徒製成者最多。

二十五日 陽湖同鄉高仰之勳來談。高帝國大學法科。於法律學研究已深。又專意於國際公法者。午餐後偕至日比谷公園松本樓酌敘。至八時回寓。

二十六日 五十嵐敬止君來談。又爲言各銀行辦法規則。(另紙鈔綴甚多。未能悉行記入。)在寓留餐。午後赴京橋區靈岸島東京商學校。適是日校中祭日休假。愛理云。日本學校。有國民紀念休期。國家重大之事件。欲使國民常懸心目。一日而不忘。因設此紀念日。如幕府政權奉還之日。偉人傑士身殉國難之日。以舉紀念之式。其本意在鼓舞愛國之精神。興起追慕英雄之情感。表成國民之本分。當行紀念式之日。全校生徒集講室。訓導之人演說紀念之大要。舉一齊唱歌。以興起其發揚蹈厲之氣。日本之尙武精神。愛國思想。皆此等舉動有以振挈之也。(中國校中以端午中秋爲佳節。休假無謂。)

二十七日 赴芝區三田赤羽町觀海軍兵器局。局地舊爲有馬侯邸。凡海軍所用之兵器。俱在此局製造。局長爲言。日本海軍有專門學校。海軍兵學校。爲養成將校而設。海軍機關學校。爲養成機關員而設。海軍大學校。爲授將校及機關員之高等教育而設。此外海軍礮術練習所。水雷練習所。機關術練習所。皆與此局互相聯貫。局內各員。

皆工科博士學士充之。午赴高輪車町游泉岳寺。

二十八日 午後偕嘉定葛竹書成助友潮觀五二共進博覽會。會係商人組織。爲勝俄紀念而設。商品分全國產地陳列。內又分美術、圖畫、教育、機械、陶漆、織練、各門。陸離光怪。目爲之炫。

二十九日 閱報紙悉日人今日開黃海戰事紀念會。聞之蹙額。愛理云。昔年日人勝遼陽。得旅順。張燈懸旗。舉國若狂。我國留學在此者。目覩此象。最爲難堪。

八月初一日、十時赴外務省訪岩村君晤。託紹介赴東京市役所。參攷市町村之制。午後赴本鄉區集賢館訪孟氏昆季。

初二日 將日記略加整理。付諸印刷。以存鴻爪。此後有記。則另編焉。

6

34114
3
①

116
1-58